

**KANTONALNA
PRIVREDNA
KOMORA TUZLA**

**BROJ 7 - 9/20,
juli/septembar
2020. godine**



KOMORSKI INFORMATOR



**PRVI SAVJETNIK AMBASADE
I.R. IRAN U KOMORI**



**PREDSTAVNIK EUFOR-A U
KOMORI**



**“PRIVREDA TK” NA SAJMU U
GRADAČCU**



**“PRIVREDA TK” NA SAJMU U
LUKAVCU**



Komorski informator Uvod

Poštovani čitaoci!



Komorski informator za period juli/septembar 2020. godine donosi:

- Prvi savjetnik ambasade I.R. Iran posjetio Komoru - Razgovarano o unaprjeđenju vanjsko trgovinske-razmjene između Irana i Tuzlanskog kantona
- Predstavnik EUFOR-a boravio u Komori - Predstavljena privreda Tuzlanskog kantona – Analizirano stanje u oblasti tekstilne industrije, oblasti turizma i ugostiteljstva
- Obilježen jubilej Solane d.d. Tuzla – 135. godina uspješnog rada
- Delegacije Komore posjetila SKPC “Mejdan” Tuzla
- Grad Tuzla i UNDP u obnovi Mejdana
- Javni poziv za usavršavanje za NO i UO, u toku prijave
- RMU Banovići - Planirane investicije u ovoj godini 34 miliona KM - U toku priprema tendera za nabavku širokog mehanizovang čela
- 2. Sarajevo TechLab - “Stay Connected” - Obilježen dan BH Telecoma - Bruto dobit u 2019. iznosila 57 miliona KM
- Fabrika cementa Lukavac - Investiranje 4,5 miliona KM u 2020. godini - Ukupan prihod 78 miliona KM u 2019.
- Izgradnja Bloka 7 TE Tuzla - Kinezi preuzimaju površinu za Blok 7 u Tuzli - Gradnju počinju nakon dobijanja dozvola -
- Tuzlanski Cestotehnik postao većinski vlasnik Dobojuputeva - Investicija od 3,18 miliona maraka
- Održan 47. sajam šljive - “Privreda TK” na sajmu u Gradačacu - 150 izlagača iz Bosne i Hercegovine i zemalja regiona
- Održan 18. sajam “List” “Privreda TK” na sajmu u Lukavcu - Dodijeljena priznanja i nagrada „Zvijezda turizma BiH” za 2019. godinu
- FINra obilježila 4 godine uspješnog rada
- „TQM“ Lukavac - Prepoznatljiv brend na tržištu BiH - Ostvareni prihod 1,3 miliona KM u 2019.
- Farma zdrave hrane – „Milo selo“ - Pozitivna priča o vrijednim farmerima
- Kompanija Transcom nastavlja zapošljavati u Tuzli

Dino Kalesić
gl. i odg. urednik



KANTONALNA
PRIVREDNA
KOMORA TUZLA

Komorski informator Sadržaj

KANTONALNA
PRIVREDNA
KOMORA TUZLA

KOMORSKI INFORMATOR
BROJ 7 - 9/20,
juli/septembar
2020. godine

IZDAVAČKI SAVJET:

1. Nedret Kikanović, član
2. Mirsad Kukić, član
3. Izet Džananović, član
4. Suad Selimović, član
5. Edina Kurtić, član

REDAKCIJSKI KOLEGIJ:

1. Nedret Kikanović, član
2. Almir Mešić, član
3. Edina Kurtić, član
4. Suad Selimović, član

IZDAVAČ:

Kantonalna privredna
komora Tuzla

GL. I ODGOVORNI UREDNIK:

Dino Kalesić

TEHNIČKA PRIPREMA, REPRO I ŠTAMPA:

GRIN d.o.o. Gračanica

ZA ŠTAMPARIJU:

Hariz Altumbabić, direktor

TIRAŽ:

500 primjeraka.

ADRESA:

Trg slobode bb
e-mail: kpktz.ba@bih.net.ba
<http://www.kpktz.ba>

	Prvi savjetnik ambasade I.R. Iran u Komori	4
	Predstavnik EUFOR-a u Komori	5
	Obilježen jubilej Solane d.d. Tuzla – 135. godina uspješnog rada	5
	Komora u posjeti SKPC “Mejdan” Tuzla	6
	Usavršavanje za NO i UO, u toku prijave	8
	Za poljoprivredu oko 7, 6 miliona KM	9
	RMU Banovići...Planirane investicije u ovoj godini 34 miliona KM	10 i 11
	Obilježen dan BH Telecoma	12 i 13
	Fabrika cementa Lukavac... Investiranje 4,5 miliona KM u 2020. godini	14 i 15
	Kinezi preuzimaju površinu za Blok 7 u Tuzli	16
	Tuzlanski Cestotehnik postao većinski vlasnik Dobojuputeva	17
	“Privreda TK” na sajmu u Gradačcu	18
	“Privreda TK” na sajmu u Lukavcu	19



Prijem u Komori...

Prvi savjetnik ambasade I.R. Iran u Komori

Razgovarano o unaprjeđenju vanjsko trgovinske-razmjene između Irana i Tuzlanskog kantona



U Kantonalnoj privrednoj komori Tuzla održan je sastanak između privrednika Tuzlanskog kantona i Jaabera Vasigha prvog savjetnika ambasade Republike Iran. Na sastanku sa predstavnicima Kantonalne privredne komore Tuzlanskog kantona razgovarano je o unaprjeđenju vanjsko trgovinske-razmjene između Irana i Tuzlanskog kantona.

Dogovoren je direktan uvoz orašastih plodova i agruma u Tuzlanski kanton dok je Iran zainteresovan za uvoz drvnih sortimenata i pilećeg mesa iz Tuzlanskog kantona, a moguće je i uspostavljanje saradnje u oblasti elektroindustrije.

Na tržištu Irana ima mjesta za bh proizvode. Prošle godine u Iran su izvezeni drveni proizvodi čija ukupna vrijednost premašuje milion tri stotine hiljada maraka. Vrijednost voća uvezenog iz Irana u TK prošle godine je bila 580 000 KM, a ove godine 60 000 KM. Mjere zaštite od koronavirusa imale su negativan uticaj na vanjskotrgovinsku razmjenu između ovih dviju zemalja, ali Kantonalna privredna komora TK sada nastoji ojačati saradnju i privrednicima omogućiti veći uvoz, odnosno izvoz.

„Prije svega se zahvaljujem Ekselenciji na inicijativi za ovaj sastanak, razgovor o unaprjeđenju saradnje i kada je u pitanju uvoz i kada je u pitanju izvoz. Ono što je interesantno za TK je uvoz agruma i ostalih proizvoda od voća koje imaju u Iranu, a želimo pokušati nastaviti saradnju i proširiti je plasmanom pilećeg mesa, drvnih proizvoda i proizvoda iz oblasti elektroindustrije. Trebamo ozbiljnu pripremu za izvoz koksa. Otvorili smo i razgovore na temu zajedničke videokonferencije”, rekao je Nedret Kikanović predsjednik Kantonalne privredne komore Tuzla. Pojedine proizvode iz Irana bh privrednici do sada su uvozili posredno, preko dobavljača iz drugih evropskih zemalja, a sada im se pruža mogućnost da to čine direktno.

Jaaber Vasigh prvi savjetnik ambasade I.R. Irana i predstavnik Kantonalne privredne komore Tuzla dogovorili su i zajedničku videokonferenciju na kojoj bi sa privrednicima trebali utvrditi detalje daljnijeg širenja saradnje. Iran ostvaruje

Vanjsko-trgovinsku razmjenu sa BiH ali kako kažu, posebno su zainteresovani za proizvode iz TK iz oblasti drvne i elektroindustrije, kao i za pileće meso, veoma traženo u Iranu. „Rano je za konkretne informacije o narednim koracima ali je činjenica da postoje interesi za unaprjeđenje saradnje, dizanje na viši nivo. Ovaj susret je veoma značajan i dobar temelj za nastavak i jačanje saradnje. Raduje nas i direktan kontakt sa privrednicima“, izjavio je ambasador Jaaber.



„Raduje me ova komorska aktivnost i sigurno je dobra osnova za ostvarivanje novih kontakata i proširenje tržišta. Nas konkretno interesuje njihova paleta proizvoda voća i povrća, posebno nas interesuje datule. Imamo na našem tržištu roba iz Irana i sigurno je konkurentna, kvalitetna i ima osnova očekivati da se jače povežemo u narednom periodu. Otvorili smo i temu citrusa, kvalitetna paleta njihovih proizvoda koju možemo plasirati na našem tržištu. Svim otvorenim razgovorima i kontaktima, sigurno može doprinijeti održavanje zajedničke videokonferencije koja je najavljena na ovom sastanku u Kantonalnoj privrednoj komori Tuzla”, izjavio je Miralem Halilović vlasnik firme “Zemax” Gradačac.

D.K.



Razgovor o privrednim kretanjima...

Predstavnik EUFOR-a u Komori

Predstavljena privreda Tuzlanskog kantona – Analizirano stanje u oblasti tekstilne industrije, oblasti turizma i ugostiteljstva – Razgovarano o zadacima EUFOR-a – Informacije o saradnji sa Vladom Tuzlanskog kantona



Nedret Kikanović predsjednik Kantonalne privredne komore Tuzla, primio je sa saradnicima u posjetu majora Matthias Corrodia komandantna LOT kuće EUFOR-a Tuzla. Bila je ovo prilika da se uvažnom gostu koji obnaša izuzetno važnu funkciju u našem regionu, predstavi privreda Tuzlanskog kantona. Bilo je riječi o privrednim kretanjima, glavnim karakteristikama privrede regije koju pokriva Kantonalna privredna komora Tuzla, o izvoznim orijentacijama, robama koje se iz drugih zemalja uvoze na područje Tuzlanskog kantona, problemima sa kojima se kantonalna privreda susreće, posebno, negativnom uticaju pandemije izazvane koronavirusom Covid 19, na privredu TK. Predsjednik Kikanović je uvažnom gostu objasnio situaciju vezanu za probleme u autoindustriji Tuzlanskog kantona koja je naslonjena na privredne gigante u Njemačkoj a koji su također bili pod udarom krize. Tekstilna inudstrija ima velikih problema jer jer dobrim dijelom naslonjena na Kinu. Oblast ugostiteljstva i turizma bila je

onemogućena djelovati pod Korona mjerama, bankarski sektor je danas mnogo obazriviji, teže se dolazi do kredita, komplovanija je procedura, kamete su povećane. Sve ovo je, prema riječima Kikanovića, pojašnjeno i obuhvaćeno mjerama koje su vladama upućene iz Komore a kako bi se pomoglo privredi. Uz sve pomenuto, mjere pomoći bi trebale obuhvatiti i smanjenje fiskalnih i parafiskalnih nameta koji u velikoj mjeri opterećuju privredu a realno mogu biti izrazito niži, rečeno je na sastanku u Komori.

Interesovalo je predstavnika EUFOR-a i stanje kod raspodjele 330 miliona eura, prvog paketa pomoći EU za privredu, koliko Vlada uvažava preporuke iz Komore. Naglasio je glavni zadatak EUFOR-a a to je sigurnost u Bosni i Hercegovini, samim tim i u Tuzlanskom kantonu. Stava je da je i za razvoj privrede i nesmetane privredne aktivnosti, od velog značaja sigurnost u regionu.

Komandant Matthias je zahvalio domaćinu na toploj dobrodošlici i informacijama koje je dobio a koje će biti od velikog značaja u obavljanju važnih zadataka i poslova koji ga očekuju u njegovom mandatu i poslu u Bosni i Hercegovini. Istakao je uvaženi gost kako je tokom posjete Tuzlanskom kantonu, Kantonalnoj privrednoj komori Tuzla, dobio izuzetne važne informacije koje će sa velikim zadovoljstvom prenijeti u Komandu EUFOR-a. Na kraju sastanka u Kantonalnoj privrednoj komori Tuzla, obje strane su izrazile zadovoljstvo susretom i nadu da će u narednom periodu doći do zajedničkih aktivnosti na projektima koji budu realizovani u Tuzlanskom kantonu.



Obilježen jubilej Solane d.d. Tuzla – 135 godina uspješnog rada

Solana d.d. Tuzla – 135 godina uspješnog rada



Jubilej, 135 godina kontinuiteta uspješnog rada obilježen je u krugu kompanije gdje je upriličen prijem porodicama poginulih boraca Solane te je polaganjem cvijeća na spomen obilježje palim borcima Solane d.d. Tuzla završen skroman, u skladu sa datim uslovima, zvanični protokol jubileja. Prilikom obraćanja prisutnim, Direktor Solane je istakao: „Obzirom da je Solana d.d. Tuzla društveno odgovorna kompanija, proslava sa partnerima, radnicima i penzionerima je prolongirana za neka „zdravstveno“ sigurnija vremena, a novac planiran za tu namjenu će se preusmjeriti tamo gdje je taj novac

najpotrebniji odnosno najugroženijim kategorijama...“. Pored članova porodica poginulih boraca, zaposlenika, članova Uprave, predstavnika JOB-a i Sindikata, Aktiva žena, polaganju cvijeća prisustvovao je i gradonačelnik Tuzle g-din Jasmin Imamović koji se obratio prisutnim i čestitao zaspolenicima Solane d.d. Tuzla kontinuitet uspješnih poslovnih rezultata.

D.K.



Potrebna pomoć tuzlanskom Mejdanu...

Komora u posjeti SKPC "Mejdan" Tuzla



Delegacija Kantonalne privredne komore Tuzla, upriličila je posjetu SKPC "Mejdan" Tuzla. Nedret Kikanović predsjednik Komore, sa saradnicima je obišao poplavljene prostorije Sportskog kulturno-privrednog centra "Mejdan". U razgovoru sa Jasenkom Elezovićem direktorom "Mejdana", upoznati su sa problemima koje je uzrokovala nedavna poplava. Vidljivi su tragovi vodene bujice, parket u velikoj dvorani je skoro pa potpuno uništen, i sasvim je sigurno je je pričinjena velika materijalna šteta. Kako je istakao direktor Elezović, očekuje se zvanična procjena štete koja će usmjeriti daljnje aktivnosti na saniranju problema. Već su "Mejdan" ranije posjetili i predstavnici Gradske uprave, Vlade i Skupštine Tuzlanskog kantona, apeli za pomoć i podrška stižu od brojnih sportskih kolektiva i institucija. I Grad Tuzla i Vlada Tuzlanskog kantona su spremni pomoći obnovi Mejdana a dogovoreno je i da će Kantonalna privredna komora Tuzla dati podršku animiranjem privrednika i javnosti pozivima na pomoć. Apel za pomoć Mejdanu objavljen je na web stranici Komore, na Led displayu koji je posatavljen na zgradi Komore, u Vijestima iz privrede koje Komora distribuira svako jutro na oko 600 mail adresa u BiH, Srbiji, Hrvatskoj i Crnoj Gori. I ovom prilikom, upućuje se apel svima koji su u prilici, da pomognu Mejdanu u ovoj veoma teškoj situaciji.

Pozivamo Vas da, u skladu sa vašim mogućnostima, pružite finansijsku pomoć uplatom na račun broj: 1321002022764967, a za uplate iz inostranstva na račun broj: IBAN: BA391321010098470964 otvoren kod NLB BANKE TUZLA sa naznakom „MEJDAN ZA BUDUĆE GENERACIJE“.

Pozivom na telefonski broj 090291060 donirate 2,00 KM za pomoć u obnovi Mejdana.

Poštovani ljubitelji sporta i sportski prijatelji,



Obraćamo vam se u situaciji kada SKPC Mejdan, hram sporta, kulture i privrede, zbog nezapamćenog nevremena, koje je zadesilo grad Tuzlu, prolazi kroz veoma teške trenutke. Olujno nevrijeme, ogromne količine kiše i voda sa okolnih padina, poplavili su Mejdan i nanijeli veliku štetu cijelom objektu, a posebno u velikoj dvorani, svlačionicama, kuglani i svim prostorima u donjoj etaži. Tokom svog postojanja, od 1984. godine, Mejdan je mnogima pomogao u odrastanju, razvoju, postizanju prvih uspjeha. Pomogao je i državi Bosni i Hercegovini jer je bio najbolji domaćin domaćim i gostujućim reprezentacijama, kojima mnoge druge sportske dvorane nisu željele izaći u susret i obezbijediti salu i ostale potrebne uvjete. Sada je pomoć potrebna Mejdanu. Obnovom Mejdana, ponovo ćemo stvoriti uslove stotinama sportista svih omladinskih i seniorskih kategorija i svih sportskih disciplina da nastave sa svojim školama

sporta, treninzima i utakmicama. Vratićemo navijače i publiku na naše tribine. Grad Tuzla će pružiti pomoć, ali uz vašu podršku obnova će biti brža i Mejdan će brže ponovo otvoriti svoja vrata i svoju dušu svim generacijama. Samo zajedničkim snagama i solidarnošću možemo vratiti Mejdanu stari sjaj, obnoviti devastirane površine i vratiti ga na raspolaganje sportistima i građanima Tuzle i Bosne i Hercegovine.

D.K.



Svi za Mejdan...

Grad Tuzla i UNDP u obnovi Mejdana

Gradonačelnik Tuzle i zamjenik rezidentne predstavnice UNDP u BiH potpisali Sporazum o finansiranju projekta, u okviru kojeg će biti finansirana obnova objekta SKPC Mejdan



Jasmin Imamović gradonačelnik Tuzle sa saradnicima se susreo sa zamjenikom rezidentne predstavnice Razvojnog programa Ujedinjenih nacija – UNDP u Bosni i Hercegovini, Sukhrobom Khoshmukhamedovim i saradnicima, Sinišom Rodićem i Sinišom Ubiparipovićem. Imamović i Khoshmukhamedov su iskazali zadovoljstvo dosadašnjom dobrom saradnjom Grada Tuzle i Razvojnog programa Ujedinjenih nacija – UNDP. „Imamo kvalitetnu saradnju sa Gradom Tuzlom i to u nekoliko sektora: energija i okoliš, održivi ruralni razvoj, dobro upravljanje i drugo. Današnjom posjetom započinjemo novu fazu saradnje u oblasti energije i okoliša i u narednom periodu ćemo proširiti našu saradnju u ovoj oblasti, prije svega vezano za energetska efikasnost dvorane Mejdan“, izjavio je Sukhrob Khoshmukhamedov.

Nakon sastanka u gradskoj upravi, delegacije Grada Tuzle i UNDP u BiH posjetili su SKPC Mejdan, gdje su, simbolično, u oštećenoj sali Mejdana, gradonačelnik Imamović i zamjenik rezidentne predstavnice UNDP u BiH Khoshmukhamedov potpisali Sporazum o finansiranju projekta, u okviru kojeg će biti realizovana obnova objekta SKPC Mejdan. Zadovoljstvo potpisanim Sporazumom izrazio je gradonačelnik Imamović: „Ovo je prvi korak u zajedničkoj namjeri Grada Tuzle i UNDP u BiH, da Mejdan u konačnici, već iduće godine bude bolji nego što je bio prije poplave. U ovoj prvoj fazi planiramo sanirati uzroke i posljedice poplave, a cilj nam je da se Mejdan obnovi tako da bude mnogo održiviji, da ima manje troškove i da bude energetski efikasan objekat. Energetska efikasnost je štednja, dio zelene ekonomije i našeg ukupnog razvoja, a u okviru ovog projekta radićemo i na unapređenju energetske efikasnosti objekta Mejdana. Danas smo potpisali Sporazum i to je samo prvi korak, u kojem ćemo zajedno uložiti oko pola miliona KM, a onda ćemo u narednoj budžetskoj i kalendarskoj godini nastaviti sa novim ulaganjima u obnovu Mejdana.“



Nakon potpisivanja Sporazuma, predstavnici Grada Tuzle i UNDP u BiH su posjetili kompleks Panonika i Solanu, gdje su sreli sa direktorom Bakirom Smailagićem i izvršnom direktoricom Melihom Rizvić. Direktor Solane je gostima predstavio Solanu, a posebno Muzej solarstva i pogon stare Fabrike soli. Tokom posjete Solani razgovaralo se o saradnji i mogućnostima obnove Muzeja solarstva i stare Fabrike soli. Pored gradonačelnika Jasmina Imamovića, sastancima su prisustvovali Zijad Lugavić, pomoćnik gradonačelnika za ekonomski razvoj, poduzetništvo i poljoprivredu, Vedran Lakić, savjetnik gradonačelnika, Svjetlana Kakeš, šefica Stručne službe za posloive gradonačelnika i Jasenko Elezović, direktor JP SKPC Mejdan.

Grad Tuzla



Javni poziv za usavršavanje...

Usavršavanje za NO i UO, u toku prijave

Javni poziv za dostavljanje prijava

Kantonalna privredna komora Tuzla prikuplja prijave za novu grupu za Usavršavanje predsjednika i članova nadzornih odbora i uprava privrednih društava sa učešćem državnog kapitala (prema Uredbi Vlade FBiH, "Službene novine F BiH", br. 71/09, 33/10, 23/11, 83/11, 2/13, 80/13, 48/15, 60/16 i 88/17).

Početak edukacije je planiran za jesen 2020. nakon formiranja grupe, a u zavisnosti od epidemiološke situacije, organizovat će se u prostorijama Komore u Tuzli ili online putem Zoom platforme, o čemu će odluka biti donesena neposredno pred početak.

Zainteresovani kandidati prijavu mogu izvršiti dostavom prijavnog upitnika (na web stranici Komore: www.kpktz.ba).

Potrebna dokumentacija:

1. prijavni upitnik
2. kopija diplome
3. uvjerenje o radnom iskustvu u struci

Cijena usavršavanja (edukacija, literatura, ispit i certifikacija) je 880,00 KM po polazniku, a informacije o rokovima i načinu uplate bit će Vam dostavljene nakon određivanja datuma početka.

Prijave i sve dodatne informacije na mail: edina@kpktz.ba ili putem faxesa na broj 035/369-552 ili poštom na adresu Trg slobode bb, 75000 Tuzla.

Kantonalna privredna komora Tuzla
Trg slobode bb, 75 000 Tuzla

Rok za podnošenje prijava kao i tačan termin početka usavršavanja, biće naknadno utvrđeni, po formiranju nove grupe polaznika.

U P I T N I K na <http://kpktz.ba/index.php/usavrsavanje>



Iz Udruženja za poljoprivredu i prehrambenu industriju...

Za poljoprivredu oko 7, 6 miliona KM



Članovi Odbora Udruženja za poljoprivredu i prehrambenu industriju Kantonalne privredne komore Tuzla, održali su redovnu sjednicu u proširenom sastavu. Razmatran je Prijedlog novčanih podrški Grupacija poljoprivrednih proizvođača u 2020. godini za Program novčanih podrški u poljoprivredi i ruralnom razvoju u ovoj godini na području kantona. Ovgodišnja finansijska sredstva i poticaji koje izdvaja Ministarstvo poljoprivrede, šumarstva i vodoprivrede TK, su duplirana i iznose oko 7, 6 miliona KM. Vlada TK je povećala podršku poljoprivrednoj proizvodnji, sa oko 3 i po miliona koliko je bilo prošle godine, na 7 miliona KM za 2020 godinu. Obezbijedeno je još 650 000 KM iz Federalnog budžeta. Proizvodnja voća, povrća i mlijeka biće prioriteta, a neće biti zanemareni

ni ostali proizvođači kojima će također biti omogućeno širenje proizvodnje. Novina je podrška za nabavku osnovnog stada, rečeno je na sastanku predstavnika Vlade TK i grupacija poljoprivrednih proizvođača u Kantonalnoj privrednoj komori Tuzla, pri razmatranju Programa podsticaja poljoprivrednoj proizvodnji za 2020. godinu. Poljoprivredni proizvođači koji ispunjavaju uslove za ostvarivanje novčane podrške po ustaljenoj praksi, dostavljaju gradovima, općinama i resornom ministarstvu do septembra, dok bi isplata trebala biti realizovana do kraja tekuće godine.

Podrška poljoprivrednoj proizvodnji povećana sa 4,5 na 7 miliona KM



Vlada Tuzlanskog kantona je na 51. redovnoj sjednici donijela Odluku o izmjenama i dopunama Programa novčanih podrški u poljoprivredi i ruralnom razvoju u 2020. godini, te prvobitno predviđeni iznos od 4,5 miliona KM, povećala na 7 miliona KM. Ovim izmjenama predviđeno je i da se korisnicima koji imaju registrovan obrt obračuna 20 % veći iznos novčane podrške po jedinici mjere u odnosu na visinu novčane podrške planiranu ovim Programom u okviru modela podrške proizvodnji za animalnu i biljnu proizvodnju. Ovom odlukom Vlada Tuzlanskog kantona, uvažavajući trenutnu situaciju i potrebe povećanja obima poljoprivredne proizvodnje i sigurnost prehrane stanovništva Tuzlanskog kantona, nastoji ublažiti negativne ekonomske posljedice stanja nesreće po poljoprivredu Tuzlanskog kantona.

Nova članica Komore...

"Megaprom" doo Lukavac

Prodaja i transport uglja na rate



„Porodična firma koja je već dugi niz godina u poslu prodaje i transporta svih vrsta uglja s područja Tuzlanskog kantona. Sa našim kamionima u mogućnosti smo u najkraćem vremenskom roku dostaviti uglj na svaku adresu ne samo Tuzle i Tuzlanskog kantona nego i šireg područja. Ono što nas izdvaja od drugih je da nudimo mogućnost otplate uglja na rate kao i posebna ponuda za penzionere. Naša preporuka je da kupujete uglj u proljetnim ili ljetnim mjesecima. Ne samo da izbjegnute moguću gužvu i čekanje već time dobijate uglj koji će se optimalno osušiti do zime, povećavajući kaloričnost što ujedno znači i uštedu vašeg novca. Mi ne lagerujemo uglj, što znači da se dostava vrši direktno iz rudnika. U slučaju da niste sigurni koju vrstu uglja izabrati ili koja količina uglja Vam je potrebna, stojimo Vam na raspolaganju u svakom trenutku“, izjavio je Dragan Iljić direktor firm e "Megaprom" doo Lukavac, prodaja i transport uglja na rate.

Kontakt:

+387 35 541 233 +387 62 520 645

info@megaprom.ba <https://megaprom.ba>



RMU Banovići...

Planirane investicije u ovoj godini 34 miliona KM

U toku priprema tendera za nabavku širokog mehanizovang čela



Iako je planom poslovanja za prvu polovinu godine u Rudnicima mrkog uglja Banovići bio predviđen gubitak od četiri miliona i 200 hiljada KM, menadžment je zajedno s radnicima uspio sanirati štete i ostvariti dobit od 1,2 miliona KM. U ovom preduzeću krenuli su i u nabavku mehanizacije potrebne za rad na eksploataciji, ali i preradi uglja. Buldožeri, greder i cisterna samo su neke od mašina potrebnih za rad, a čija je nabavka planirana ove godine. **"Iz vlastitih sredstava će biti finansiranje. Imamo u ovoj godini još drobilicu dolje na Separaciji, do Nove godine to će biti prioritet u rješavanju, da bi nesmetano mogao funkcionisati proces proizvodnje"**, navodi Fadil Kudumović, v.d. direktor RMU "Banovići" d.d. Banovići. Nedavno je direktor Rudnika potpisao ugovor za nabavku gredera CAT 16 u vrijednosti 1,5 miliona KM sa

predstavnikom sarajevske kompanije koja će izvršiti isporuku ove mašine. Isporuka gredera bit će izvršena u roku od šest mjeseci, a montažu će obaviti specijalizovana ekipa Rudnika uz stručnu pomoć prodavca opreme. Nabavka tog gredera namijenjena je za potrebe površinske eksploatacije uglja. Pored planirane realizacije nabavke pomoćne mehanizacije u ovoj godini, mnogo je započetog posla nabavki iz 2019. godine, pa se i to rješava u ovoj godini. **"Treba da kažem, to su stalne potrebe, svake godine imamo potrebu da obnavljamo tu prateću, pomoćnu mehanizaciju, bez koje je rad na površinskim kopovima, skoro pa nemoguć. Svjedoci smo da je prvi period godine bio jako kišan i ta mehanizacija je baš neophodna"**, Damir Mrkonjić, v.d. izvršni direktor za investicije i razvoj novih djelatnosti RMU "Banovići" d.d. Banovići. Vrijednost nabavki koje su prenjete iz prošle godine je 22 miliona i 400 hiljada KM, dok su u ovoj godini planirane nabavke vrijednosti 34 miliona i 170 hiljada. Kada je u pitanju 2020-ta, do sada su nabavljeni određeni motori za kamione, u toku je nabavka garniture za bušenje, a radi se i na nastavku izgradnje transportnog sistema. **"U toku je i priprema tendera za nabavku širokog mehanizovang čela, negdje procijenjene vrijednosti oko 22 miliona KM"**, ističe Mrkonjić. Planiranim investicijama, želja i cilj Uprave RMU Banovići je dobiti veću pouzdanost u tehnološkom procesu, odnosno stvoriti dobre uslove za rad, kako bi se mogla ostvariti predviđena proizvodnja uglja.

Kako rudnik u Banovićima prvi put posluje pozitivno

Stroge kontrole javnih nabavki i nagrađivanja

Nakon brojnih problema bolji dani su došli za Rudnik mrkog uglja (RMU) u Banovićima. Gubitak za ovu godinu je bio predviđen u iznosu od četiri miliona konvertibilnih maraka, ali su stvari krenule u suprotnom smjeru te su reorganizacijom poslovanja prvi put nakon rata uspjeli ostvariti polugodišnju dobit od milion maraka. Pozitivno poslovanje je nastavljeno, a do kraja ove godine će biti realizirane i značajne investicije. U mjesecu maju ove godine imenovana je nova uprava (RMU) Banovići na čelu sa direktorom Fadilom Kudumovićem, koji u razgovoru za Klix.ba kaže da se zatečeno stanje drastično razlikuje od onoga koje je danas prisutno. **"Prilikom našeg dolaska u rudnik dočekala su nas kreditna zaduženja prethodne uprave u iznosu od skoro 50 miliona KM te neizmirene obaveze prema određenim ugovorima. S obzirom da smo imenovani na period od šest mjeseci prevelike zahvate nismo mogli pokrenuti, ali smo uspjeli povećati proizvodnju, u saradnji sa Vladom Federacije BiH sanirali smo određena dugovanja, a prvi put nakon rata smo ostvarili i pozitivno poslovanje"**, kaže Kudumović.

Loše provođenje javnih nabavki

Prema svim finansijskim dokumentima, banovički rudnik od rata pa na ovamo nikada pozitivno nije poslovao. Negativan trend bio je planiran i za ovu godinu, a u finansijskom planu za prvo polugodište bio je iskazan gubitak od 4.200.000 KM. Međutim, ovaj rudnik je uspio pokazati suprotno te ostvariti pozitivno poslovanje od miliona maraka. **"To smo ostvarili uštedama kroz kontrolisanje javnih nabavki. Naime, u prethodnom periodu je nabavljano svega i svačega, tako da sada na stanju u magacinima imamo više od 36 miliona rezervnih dijelova, a pretpostavke su da više od pola nije za našu upotrebu. Tu su napravljeni veliki rezovi, a smanjili smo i nekontrolisano nagrađivanje podobnih pojedinaca koji su bili u prethodnom periodu. Mi želimo nagraditi, ali pravog proizvodnog radnika koji radi"**, naglašava Kudumović. Dnevna proizvodnja u rudniku



iznosi između 4,5 i 5,5 hiljada tona uglja, u zavisnosti od nekoliko faktora, što je predviđeno ranijim planovima koje sagovornik ocjenjuje nerealistično. **"To je priznala i prethodna uprava jer je naprimjer godišnja proizvodnja u jami Omazići povećana za okvirno 200.000 tona što je realno nemoguće proizvesti te se trenutno proizvodni proces odvija u obimu od 92 posto na godišnjem nivou. Tu ćemo krajem septembra imati jedan kratkotrajni zastoj u radu zbog premještanja širokog čela u drugo otkopno polje kako bismo mogli nastaviti sa daljim radom"**, kaže sagovornik portala Klix.ba. Trenutno u površinskoj eksploataciji rudnik u otkrivačima na dnevnom nivou ima više od 43 hiljade tona uglja, što je rekordno za Banoviće. **"Nadamo se da ćemo do kraja godine ispoštovati planove, koji se ogledaju u direktnoj otkrivači od 12 miliona tona uglja, a proizvodnja je projektovana na 1,7 miliona tona uglja. Trenutno je separisano okvirno 1,1 milion tona uglja, blizu devet miliona tona ulja je u otkrivači, ali naš finalni rezultat ovisi i od potreba za ugljem na tržištu"**, dodaje Kudumović.



Novo investicije

Dotrajala pomoćna mehanizacija stvarala je velike probleme u proizvodnom procesu, ali je u proteklom mjesecima došlo do popravke mašina. **"Trenutno imamo tri buldožera koji su proizvedeni 1986. godine, tako da su prevazišli svoj vijek trajanja. Ali, nadljudskim naporima smo ih uspjeli osposobiti i trenutno su funkcionalni. Novu opremu je potrebno nabaviti, a već dvije godine se pokušavaju kupiti četiri nova buldožera, međutim zbog javnih nabavki taj proces je skoro nemoguć jer se žali svako na svakog"**, ističe prvi čovjek banovičkog rudnika koji je kao vršilac dužnosti imenovan na period od šest mjeseci. Prema planu do kraja ove godine trebala bi biti nabavljena i drobilica za korištenje na separaciji, kao i transportni sistem na Površinskom kopu Turija čime će biti zaokružen aktuelni proces investicija u iznosu od 47 miliona KM. Među investicionim planovima za 2021. je mehanizovano visoko čelo za jamu Omazići u vrijednosti od 22 miliona KM, što će omogućiti dalju jamsku eksploataciju. Inače, nabavka nove opreme stvorit će i humanije uslove rada za sve rudare koji su zaposleni u RMU Banovići. **"Naš glavni korak u radu je vođenje računa o zaštiti i sigurnosti radnika, a to se prvenstveno odnosi na jamu gdje su teški uslovi za rad. U odnosu na raniji period mi smo uspjeli smanjiti i broj povreda na radu za 60 posto. Cilj je i da nagradimo proizvodne radnike, a da bismo to mogli realizirati moramo uraditi sistematizaciju kompletnog rudnika"**, otkriva Kudumović jedan od daljih planova.

Niko neće ostati bez posla

Uprava rudnika već je uputila zahtjev Nadzornom odboru za izdavanje saglasnosti za sistematizaciju radnih mjesta koja, prema riječima našeg sagovornika, neće dovesti do otpuštanja radnika. **"Prerasporeda će biti, ali otpuštanja zasigurno ne. Mi ne razmišljamo o tome, već nasuprot tražit ćemo saglasnost resornog ministarstva da nam izađe u susret i omogućiti dodatno zapošljavanje radnika jer smo u deficitu sa bravarima, varijcima i inženjerima našinske struke"**, nastavlja Kudumović. U banovičkom rudniku trenutno je zaposleno 2.830 rudara. Mjesečno se za plaće radnika izdvaja šest miliona KM, dok topli obrok košta 900.000 maraka. **"Sve svoje obaveze redovno isplaćujemo prema radnicima, državi i dobavljačima. Također, mi i dugovanja po osnovu kredita redovno isplaćujemo jer smo u mogućnosti da i to obavljamo"**, nadovezuje se on. RMU Banovići jedini se ne nalazi u koncernu Elektroprivrede BiH, a trenutna uprava se zalaže da tako i ostane. **"To nam ne bi bilo značajno, s obzirom da vidimo kakvo je trenutno stanje u svim rudnicima koji su u sastavu koncerna. To je bio dobro zamišljen model, ali ne bih ulazio u to šta se dešavalo kasnije. Da je i naš rudnik tada ušao u sastav mislim da bi nam se desilo isto kao i svim ostalim rudnicima. Tamo samo jedan rudnik posluje pozitivno sa malim brojem radnika, dok su svi ostali u nezavidnom položaju"**, istaknuo je Kudumović. Izgradnja Bloka 7 Termoelektrane u Tuzli, prema riječima našeg sagovornika, neće biti značajna za RMU Banovići zbog činjenice da će ovom termoelektratskom objektu oni isporučivati tek 20 posto uglja, što je okvirno 400.000 tona. S druge strane, gašenje bloka šest koje je planirano za 2035. godinu nametnut će probleme rudniku jer mu godišnje isporučuju 1.100.000 tona uglja. **"Zbog toga je opći interes rudnika, ali i općine Banovići izgradnja naše termoelektrane. Od tog projekta nismo odustali, šta više dobili smo dopis od investitora iz Austrije koji je spreman ulagati određena sredstva. Nadzornom odboru i resornom federalnom ministarstvu smo to poslali na očitovanje i donošenje odluke o daljim aktivnostima"**, zaključio je Kudumović. RMU Banovići i u narednom periodu fokus će držati na ostvarenju veće pouzdanosti u tehnološkom procesu rada kako bi na kraju ostvarili sve svoje zacrtane ciljeve vezane za nesmetanu proizvodnju uglja.



2. Sarajevo TechLab - "Stay Connected"...

Obilježen dan BH Telecoma

Bruto dobit u 2019. iznosila 57 miliona KM

BH Telecom je održao 2. Sarajevo TechLab pod sloganom "Stay Connected" na kojem su predstavljeni rezultati rada kompanije od osnivanja. Poseban naglasak je bio na društvenoj odgovornosti jedne od najuspješnijih bosanskohercegovačkih kompanija, saopćeno je na klix.ba.

Konferencija je održana na Dan kompanije koji je utemeljen povodom probijanja telekomunikacijske blokade 1993. godine u Sarajevu. Predstavnici kompanije su podsjetili na poslovne uspjehe i pomoć kompanije drugim društvenim akterima. Ukazano je i na doprinos BH Telecoma zajednici u pandemiji koronavirusa.

Ovogodišnji Sarajevo TechLab je otvorio ministar prometa i komunikacija Federacije Bosne i Hercegovine Denis Lasić.

"Poznate su činjenice da BH Telecom pruža usluge putem svih tehnologija te da prati svjetske trendove i razvoj. Opslužuje više od dva miliona korisnika i ima najveće učešće na telekomunikacijskom tržištu", izjavio je.

Prema njegovim riječima, kompanija je kao jedna od najuspješnijih u posljednjih 15 godina uplatila 597 miliona KM Zavodu za penziono i invalidsko osiguranje, zavodima za zdravstvenu zaštitu i za doprinose nezaposlenim osobama. Podsjetio je da je firma za donacije do sada uplatila 19,5 miliona KM.

"To da čini najvećim pojedinačnim donatorom u Bosni i Hercegovini", dodao je i naveo da je dio tog novca osiguran u dvije vanredne situacije - tokom poplava u Bosni i Hercegovini 2014. i tokom pandemije koronavirusa.

Zaključio je da je BH Telecom jedan od najznačajnijih partnera sportskim kolektivima i kulturnim manifestacijama.



• Najznačajniji projekti u 2019. i planovi u ovoj godini

Direktor BH Telecoma Sedin Kahrman se zahvalio svim prethodnim direktorima smatrajući ih zaslužnim za uspjehe kompanije. Na Konferenciji im je upriličio i prijem. Posebno se osvrnuo na poslovanje u prethodnoj godini.

"Mi smo u 2019. donijeli jednu važnu odluku da 5. septembar obilježimo organizacijom poslovno-tehnološke konferencije kako priliči jednom tehnološkom lideru. Prošla godina je za


BH Telecom posebno značajna zbog niza strateških odluka koje su donesene. Pomenut ću neke od njih. To je godina u kojoj je implementiran najzahtjevniji infrastrukturni i tehnološki projekat, a mislim na 4G tehnologiju. Donijeli smo odluke za jedan proaktivan pristup i izlazak na tržište tj. ulazak u poslovne modele u kojima nismo bili - osnivanje kompanije zajedno sa Raiffesen bankom i domaćim partnerima uspostavljanjem novog ekosistema plaćanja, 'Opa' sistem, izlazak na tržište start up sistem, igradnja produkcije za audio i vizuelni sadržaj, kao i izgradnja platforme za pametna ICT rješenja", obrazložio je Kahrman.

Potcrtao je da je prošle godine ostvarena bruto dobit od 57 miliona KM, što je za tri miliona KM više od predviđenog iznosa. Kako je kazao, kao lider su u pandemiji sve svoje resurse stavili na raspolaganje. Kao značajnim je izdvojio i to što su, kako je rekao, redizajnirane sve usluge. Obznanio je i planove za ovu godinu, a neke od njih je nazvao ekskluzivnim.

"Naš plan je da u 2020. investiramo 160 miliona KM sa 115 miliona KM započetih informacija. BH Telecom je obnovio saradnju sa Sarajevo Film Festivalom. Tad smo najavili gradnju najveće platforme za produkciju audio i vizuelnog sadržaja. Mi u ovom trenutku završavamo finalnu selekciju projekata, 50 projekata je prijavljeno po javnom pozivu. Vrlo brzo, u narednih nekoliko sedmica ćemo imati ekskluzivne vijesti po pitanju sadržaja, a u interesu i na zadovoljstvo korisnika usluga BH Telecoma, prije svega usluge Moja TV", istakao je.

Kahrman je pozvao, kako je izjavio, sve kreativne ljude da im BH Telecom bude prva adresa na kojoj će imati pažnju, mentorstvo i spremnost za podršku i investiranje. Ponosan je što je oko BH Telecoma napravljena, kako je kazao, alijansa koja će pomoći najzahtjevnijim ICT potrebama. Poručio je da će se uprkos pandemiji nastaviti sa poboljšanjem usluga.

Predstavnici tehnoloških kompanija kao poslovnih partnera BH Telecoma su, između ostalog, naveli da oni uče od BH Telecoma i da BH Telecom uči od njih. Ocijenili su da je nemoguće govoriti o digitalizaciji u Bosni i Hercegovini bez BH Telecoma. Smatraju da je ova kompanija okupila sve tehnološke firme u Bosni i Hercegovini da bi se odgovorilo na izazove pandemije.



• Nagrade za najbolje start up projekte i humanitarno djelovanje

Izvršni direktor za razvoj poslovanja BH Telecoma Muamer Hadžović je govorio o njihovoj finansijskoj podršci start up projektima, a tri najuspješnija su predstavljena.

"Reći ću nekoliko riječi o najvećoj start up platformi u Bosni i Hercegovini. U biti postoji samo jedna razlika između nas i ostalih. Razlika je u tome što dodjelama nagrada nije kraj. Dodjelom nagrada je početak razvoja i saradnje, sinergije između nas i kompanija koje su dobile nagrade", izjavio je Hadžović.

Kao prvoplasirani start up projekat sa 50.000 KM nagrađen je Devoted za "Industrijsku IoT platformu". Kao drugoplasirani sa 30.000 KM nagrađen je Vista Design za projekat "Vionna Smart Solutions". Kao trećeplasirani sa 20.000 KM nagrađen je Smart Business Solutions za aplikaciju "Doktor kad mi treba".

Član Nadzornog odbora BH Telecoma Mugdim Mandžuka je ukazao na donacije koje su do sada dali. Prema njegovim riječima, samo ove godine u te svrhe je izdvojeno dva miliona KM. I on je izdvojio donacije tokom pandemije kada je osigurano milion KM u različite svrhe. Podsjetio je da su pomoć pružili bolnicama širom Federacije Bosne i Hercegovine - Konjicu, Zenici, Goraždu, Travniku i Bihacu u iznosima od po 200.000 KM, školama, fakultetima, javnim kuhinjama i drugim organizacijama. "Insistirali smo na pomoć liječenju našim najmlađim građanima", dodao je.

• Zlatni septembar - mjesec podizanja svijesti o dječijem raku

Prisutnima su prezentirane usluge i akcije koje je BH Telecom pripremio za korisnike povodom Dana kompanije. Također je prigodnim videozapisom predstavljena zajednička kampanja BH Telecoma i Udruženja "Srce za djecu oboljelu od raka" pod nazivom Zlatni septembar kojom se i ove godine istovremeno obilježava Dan BH Telecoma i Mjesec zlatnih vrpca, kao mjesec podizanja svijesti o dječijem raku.

BH Telecom ne vrši instalaciju 5G mreže



BH Telecom nema instalirane 5G bazne jedinice

Kompanija BH Telecom je saopćila da ne vrši instalaciju 5G mreže, povodom sve učestalijih upita medija, te, kako navode, neosnovanih i netačnih navoda i komentara po društvenim mrežama u kojima se lažno predstavljaju činjenice o instaliranju 5G baznih stanica u Bosni i Hercegovini. Osnovni preduslov za komercijalno puštanje 5G mreže u Bosni i Hercegovini je, navode iz BH Telecoma, uređenje regulatornog okvira i adekvatne dozvole koje izdaju nadležne institucije.

- BH Telecom nema instalirane 5G bazne jedinice na svojim baznim stanicama u BiH, niti vrši postavljanje opreme/baznih stanica bez najave. Sa svim informacijama o razvoju 5G mreže BH Telecom redovno informiše javnost i to isključivo činjenicama. Podsjećamo da je BH Telecom prvi u BiH testirao 5G u maju 2020. godine, u kontrolisanim uvjetima na lokaciji u prostorijama BH Telecoma, te nisu provedene dodatne aktivnosti na širenju, niti komercijalizaciji 5G mreže. Sve instalirane antene BH Telecoma koriste se za 2G/3G/4G mrežu, a infrastruktura se postavlja po strogim standardima. Testiranje utjecaja bazne stanice od relevantnih tijela je preduslov za upotrebnu dozvolu i puštanje opreme u rad - izjavio je v.d. izvršnog direktora za tehnologiju i razvoj servisa Adnan Huremović.

Također, najava svih radova BH Telecoma sa preciznim terminima dostavlja se nadležnim institucijama i objavljuje na web stranici BH Telecoma, a o čemu svjedoči način na koji je javnost bila upoznata tokom instalacije 4G mreže.- Nažalost, nije prvi put da se na ovakav način neodgovornim postavljanjem dezinformacija po društvenim mrežama nanosi šteta kako BH Telecomu, tako i razvoju i nivou obrazovanja društva u cjelini - navodi se u saopštenju BH Telecoma d.d. Sarajevo.

D.K.



Fabrika cementa Lukavac...

Investiranje 4,5 miliona KM u 2020. godini

Ukupan prihod 78 miliona KM u 2019. - Uveli BIM tehnologiju u poslovanje - Podržati domaću proizvodnju - „COVID-19 fotodnevnik“ Fabrike Cementa Lukavac



Zahvaljujući stabilnom poslovanju i dobroj organizaciji Fabrike cementa Lukavac d.d. u 2020. godini investiraće oko 4,5 miliona KM u projekte iz oblasti energetske efikasnosti i ekologije uprkos pandemiji COVID-19.

Kako je za Poslovne novine kazao Stjepan Kumrić, generalni direktor Fabrike cementa Lukavac d.d., zahvaljujući pravovremenoj reakciji Uprave i menadžmenta uspjeli su osigurati nesmetan rad fabrike, a proizvodnja i prodaja se odvijaju uobičajeno. „Uspješno smo prevazišli neizvjesnost koju pandemija COVID-19 nosi, djelujući po planu za krizne situacije. Bitno je da naši dobavljači, kupci i ostali poslovni partneri u svakom momentu mogu računati na nas, te smatramo da zajednički možemo doprinijeti očuvanju kontinuiteta domaće proizvodnje, koja se pokazala i jeste imperativ domaće privrede“, kaže Kumrić.

• Ukupan prihod 78 miliona KM u 2019.

Rezultati poslovanja Fabrike cementa Lukavac d.d za prvih šest mjeseci 2020. pokazuju da nije došlo do značajnijeg pada prihoda, jer su ostali na približno istom nivou prošlogodišnje realizacije. „Za Fabriku cementa Lukavac je 2019. bila uspješna poslovna godina. Sa ukupnim prihodima od 78.271.110 KM u 2019. godini i ostvarenom neto dobiti od 12.815.245 KM, rast neto dobiti u odnosu na 2018. godinu iznosio je 5%“, istaknuo je Kumrić. Kako dalje navodi Kumrić, u 2019. su proizveli rekordnih 450.000 tona cementa. Ovakav uspjeh rezultat je dugogodišnjih investicija Fabrike cementa Lukavac u nove tehnologije. „Time je omogućeno da se u postrojenjima čak do 70 posto fosilnih goriva zamijeni alternativnim izvorima energije, što jeste glavni cilj u narednom periodu. Poznati smo kao pioniri u korištenju alternativnih goriva u BiH i šire i ostvarili smo rekordan udjel ovih goriva u iznosu od 45 posto. Utrošili smo 35.000 tona goriva dobivenih iz otpada, čime je potrošnja uglja smanjena za oko 20.000 tona“, tvrdi Kumrić.

Fabrika cementa Lukavac i u 2020. godini nastavlja sa investicionim aktivnostima. „Za ovu godinu planirali smo investirati oko 4,5 miliona KM, prije svega u projekte iz oblasti energetske efikasnosti, ekologije, te projekte za povećanje konkurentnosti. Na ovaj način održavamo kontinuitet stalnih ulaganja i modernizacije naših pogona i postrojenja“, istaknuo je Kumrić.

• Uveli BIM tehnologiju u poslovanje

Osim modernizacije pogona i postrojenja, Fabrika je u maju 2020. uvela još jednu značajnu novinu u poslovanju, tzv. modernu BIM tehnologiju, koja danas igra važnu ulogu u svijetu arhitekture i građevinarstva.

„Pomoću BIM (Building Information Modeling) software-a izvršili smo digitalizaciju proizvoda od betona, te smo sada u prilici arhitektama i građevinskim kompanijama ponuditi različite vrste lukavačkih betona, koje na jednostavan način mogu ugraditi u svoje projekte kao vezivno tkivo. Svim zainteresiranim smo omogućili pristup digitalizovanim betonskim proizvodima putem web stranice <http://lukavacbeton.ba/bim/>“, objašnjava Kumrić.

Daljnja ulaganja i razvoj Fabrike cementa Lukavac, kako navodi Kumrić, zavise i od kretanja na domaćem i regionalnom tržištu, kao i daljeg nivoa potražnje za njihovim proizvodima. „Planirali smo prošle godine rast prihoda i dobiti u 2020. u normalnim



okolnostima poslovanja, ali ekonomska situacija u zemlji ima direktan utjecaj na građevinski sektor, a samim tim i na industriju građevinskih materijala. Gledamo optimistično u budućnost i nadamo se da ćemo uspjeti prebroditi ovo za sve nas teško vrijeme i ostvariti željene rezultate“, rekao je Kumrić.

• Podržati domaću proizvodnju



Direktor Fabrike cementa Lukavac savjetuje bh. privrednicima da je najvažnije imati dobar krizni plan i procijeniti rizike poslovanja za vrijeme pandemije COVID-19. „Mora se izgraditi visok nivo povjerenja sa uposlenicima, biti fleksibilan kada je to potrebno, te pružiti sigurne i adekvatne uslove za rad i u toku krize. Nismo morali otpuštati radnike, na šta smo ponosni, niti je bilo negativnih posljedica na njihove prihode. Jer, uposlenici su naša najvažnija karika. Također, trebamo svi podržavati domaću proizvodnju, osloniti se što više na domaće dobavljače, sirovine i usluge. To nam daje mogućnost da budemo samostalni, da se i u periodu krize održi proces proizvodnje, zaposlenost, te redovno izvršavaju plaćanja javnih obaveza i potaknu investicione aktivnosti“, naglasio je Kumrić.

Poslovne novine

„COVID-19 fotodnevnik“ Fabrike Cementa Lukavac

Svjedočanstvo jednog vremena



Koronavirus promijenio je mnogo toga u cijelom svijetu. S jedne strane ova pandemija je preoblikovala način dosadašnjeg života i poslovanja, dok je s druge strane pokazala da su zajedništvo, solidarnost i timski duh neophodni kako bi se prevazišlo ovo nesvakidašnje vrijeme.

Jedan od odgovora Fabrike cementa Lukavac na postojeću krizu je i projekt koji smo nazvali „COVID-19 FOTODNEVNIK“. Fotografijom je zabilježena atmosfera tokom jednog radnog dana u našoj fabrici.

Briga za naše uposlenike i njihovo zdravlje jedan je od najvažnijih postulata našeg poslovanja. Bez njih ne bi bilo ni razvoja ni evidentnog uspjeha Lukavac Cementa i Lukavac Betona.

Upravo zato smo odlučili našim saradnicima i saradnicama posvetiti „COVID-19 FOTODNEVNIK“.

Ovaj fotografski zapis predstavlja i svjedočanstvo jednog

teškog i neobičnog vremena, u kojem su uposlenice i uposlenici Lukavac Cementa i Lukavac Betona svojim odgovornim ponašanjem i zalaganjem svakodnevno davali i danas daju ogroman doprinos da naši pogoni rade bez dana prekida. Fotodnevnik je i velika zahvalnica svima njima za iskazanu odgovornost, požrtvovanost i disciplinu.

Ovo je priča u slikama, u kojoj naši uposlenici s maskama na licu i uz strogo poštivanje propisanih mjera, čvrsto vjeruju da se kriza može prevazići i da mogu uspjeti u svim izazovima koji ih očekuju.

Budimo odgovorni prema sebi i drugima!

COVID-19 FOTODNEVNIK možete pogledati na linku:
<https://lukavaccement.ba/covid-19-fotodnevnik-fabrike-cementa-lukavac-svjedocanstvo-jednog-vremena/#>





Izgradnja Bloka 7 TE Tuzla...

Kinezi preuzimaju površinu za Blok 7 u Tuzli

Gradnju počinju nakon dobijanja dozvola

Pripremi radovi za izgradnju Bloka 7 Termoelektrane u Tuzli su u završnoj fazi, a kako saznaje Klix.ba, u narednim danima će početi sukcesivna predaja gradilišta kineskim partnerima koji su zaduženi za formiranje ovog termoelektrarnog objekta. Grupa inženjera iz Kine stigla je početkom augusta u Bosnu i Hercegovinu, nakon čega su intenzivirane sve zajedničke aktivnosti između inozemnih partnera i Elektroprivrede BiH vezano za izgradnju Bloka 7 Termoelektrane u Tuzli. Kako saznaje Klix.ba, domaći konzorcij kompanija iz naše zemlje već završava svoje pripreme radove, a gradilište će uskoro biti predato stranim partnerima. Izvršni direktor za kapitalne investicije Elektroprivrede BiH Senad Salkić za Klix.ba je kazao da aktivnosti na izgradnji bloka zasad teku u skladu sa predviđenim dinamičkim planovima, obim aktivnosti se povećava iz dana u dan, a očekivanja su da će sve biti završeno do početka novembra ove godine. Kako je naglasio, prostor za izgradnju bloka je pripremljen i spreman za sukcesivnu predaju kineskom izvođaču, osnovni dijelovi baznog dizajna su usaglašeni, a ostvaruju se i pretpostavke za izradu glavnog projekta.



“U narednim danima Elektroprivreda BiH započet će sukcesivnu predaju gradilišta kineskim partnerima, kako bi se mogla izvršiti njihova mobilizacija za potrebe izgradnje bloka. Pripremni radovi koji su dio obaveze Elektroprivrede BiH i koje izvodi domaći izvođač privode se kraju. Trenutno se osiguravaju infrastrukturni priključci gradilišta kako bi izgradnja mogla nesmetano da se odvija. Paralelno s tim radi se bazni dizajn projekta koji je osnova za izradu glavnog projekta”, kazao nam je Salkić. Kineski izvođač će nakon ulaska na gradilište početi vlastitu mobilizaciju i pokrenuti aktivnosti na ispitnim aktivnostima, mjerenjima i stvaranju uslova za dolazak radnika na gradilište. **“Elektroprivreda BiH je ispunila sve obaveze i u skladu s tim izdala Obavijest o početku realizacije projekta kineskim partnerima, temeljem čega su počeli teći rokovi za realizaciju projekta. Krajem juna uplaćen je avans EPC izvođaču čime je ispunjena i posljednja obaveza Elektroprivrede BiH vezana za početak realizacije projekta”,** naglasio je Salkić. Prvi dio posla, prema riječima našeg sagovornika, odnosit će se na projektovanje, izradu glavnog projekta i dobivanje dozvola za gradnju, nakon čega će uslijediti izgradnja bloka.



U tom vremenu kineski izvođač će uraditi potrebnu infrastrukturu za gradnju bloka te izvršiti sva ispitivanja u skladu sa projektnom dokumentacijom. Termoelektrarni objekt u Tuzli će graditi kineski konzorcij China Gezhouba Group Company Limited Peking i Gedi - Guangdong Electric Power Design Institute, a dolasku stručnjaka iz Pekinga, prethodili su intenzivni radovi na pripremi terena površine 270 hektara. Vrijednost pripremnih radova je 18,9 miliona KM, a izvođač je domaći konzorcij, koji čine kompanije ITC Zenica, Integral Inženjering Banja Luka i Prijedor putevi. S druge strane, realizacija izgradnje Bloka 7, snage 450 MW električne i 270 MW toplotne energije, planirana je 56 mjeseci, a učestvovat će okvirno hiljadu radnika. Cjelokupan posao je ugovoren po principu “ključ u ruke”.



„Cestotehnik“ u preuzimanju dioničkog društva...

Tuzlanski Cestotehnik postao većinski vlasnik Dobojuputeva

Investicija od 3,18 miliona maraka – Kupovina 72,4% dionica - Tender ponudu i za otkup ostalih dionica



Tuzlanska firma Cestotehnik kupila je 72,4 posto dionica preduzeća Dobojuputevi i tako postala većinski vlasnik kompanije iz Doboju Juga, potvrđeno je za portal Klix.ba. Udio Cestotehnika u kompaniji Dobojuputevi sada iznosi blizu 77,5 posto, a posljednji paket dionica (72,4931 posto) Tuzlaci su kupili po cijeni od 3.180.000 konvertibilnih maraka.

“S jučerašnjim danom na berzi (četvrtak, op.a.) mi smo kupili dodatno 72,4 posto dionica. U Dobojuputevima smo primijetili našu priliku, a osnovna namjera je dalji razvoj firme koja je dosad bila u vlasništvu stranih dioničara, sa većinskim udjelom”, kazao je za Klix.ba vlasnik Cestotehnika iz Tuzle Adnan Sijerčić. U skladu sa odredbama Zakon o preuzimanju dioničkih društava, Cestotehnik je sada kao većinski vlasnik Dobojuputeva zvanično iskazao namjeru o raspisivanju ponude za preuzimanje preostalih 22,7522 posto dionica dioničarskog društva iz Doboju Juga, što će biti objavljeno u dnevnim novinama. **“Dat ćemo tender ponudu za otkup i ostalih dionica te ćemo vidjeti kakvo će biti interesovanje, s obzirom na to da je riječ o manjim dioničarima. Naša osnovna namjera je pored daljeg razvoja firme, širenje njenog poslovanja, kao i modernizacija. Prije tri godine smo kupili Cestotehnik te smo u duploj mjeri uspjeli podići poslovanje. To očekujemo i u segmentu Dobojuputeva, s obzirom na to da se određeni infrastrukturni projekti planiraju u tom kraju u narednih pet godina”,** istaknuo je Sijerčić.

Dioničarsko društvo Dobojuputevi osnovano je davne 1951. godine i od tada do danas nisu mijenjali svoju djelatnost. Kompanija je danas smještena u Doboju Juga, a i dalje se bavi izgradnjom i održavanjem cesta, kao i proizvodnjom te prodajom asfaltne mase, zatim izradom vertikalne i horizontalne signalizacije, ali i izvođenjem svih građevinskih radova na putevima i uz puteve...



“Po snazi kapaciteta i brojnim uspješnim poslovnima u oblasti niskogradnje preduzeće je bilo nadaleko poznato na širim prostorima nekadašnje Jugoslavije, čiji su usposlenici izgradili mnoge magistralne i regionalne saobraćajnice i to: M 17 Šamac – Sarajevo, M 17-2 Bosanski Brod – Šešije, M 14 Srbac - Gradačac, M 4 Banja Luka – Tuzla te M 16-1 Derventa – Klačnice”, naveli su iz Dobojuputeva.

Nakon ratnih dešavanja uslijedilo je izmještanja sjedišta firme iz Doboja u Matuziće koji pripadaju Doboju Jugu. Pored sjedišta firme u Matuzićima posjeduju objekte (nadzorništva) u Žepču i Zenici te asfaltnu bazu Bistrica u Maglaju.

S druge strane, preduzeće Cestotehnik d.o.o. iz Tuzle je osnovano kao privatno preduzeće za građevinarstvo i inženjering da bi u postupku usklađivanja statusa preduzeća dobilo naziv Društvo jednog lica te je potom izvršena nova reorganizacija. Osnovna djelatnost je proizvodnja, građevinarstvo, inženjering i usluge.



Održan 47. sajam šljive...

“Privreda TK” na sajmu u Gradačcu

150 izlagača iz Bosne i Hercegovine i zemalja regiona



Premijer Tuzlanskog kantona Denijal Tulumović je otvorio 47. Međunarodni sajam poljoprivrede i prehrambene industrije – Sajam šljive u Gradačcu.

Tulumović je u svom obraćanju istakao kako gradačački Sajam šljive predstavlja oslonac privrednog razvoja u Tuzlanskom Kantonu i čestitao organizatorima što su uspjeli u nakani da u kontrolisanim uslovima organizuju jednu ovakvu privrednu manifestaciju.

Ovogodišnja sajamska manifestacija održava se u specifičnim okolnostima. Zbog pandemije korona virusa reducirani su izložbeni kapaciteti na oko 2.500 m² otvorenog i zatvorenog prostora. Na sajmu, koji će trajati četiri dana, svoje će proizvode i usluge prezentovati oko 150 izlagača iz Bosne i Hercegovine i zemalja regiona.

- Sajmovi su bitna traka za razvoj ekonomije, posebno malih i srednjih preduzeća i zato treba pohvaliti ustrajnost organizatora da održe kontinuitet priređivanja međunarodnog sajma poljoprivrede i prehrambene industrije - Sajma šljive u Gradačcu. Mjesta gdje se vodi računa o autohtonom proizvodu i porijeklu hrane. Kvaliteta hrane i bioraznolikost se zadržala zahvaljujući ustrajnosti i radu poljoprivrednih proizvođača. Sve to ovom sajmu daje autentičnost. Gradačački sajam postao je simbol normalnog poslovanja i povratku privrednog razvoja koji privrednici iščekuju u ovim teškim vremenima, rekao je Denijal Tulumović, premijer Vlade Tuzlanskog kantona.

Ministar poljoprivrede, šumarstva i vodoprivrede u Vladi TK, Mustafa Šakić je istakao kako je Vlada u proteklih godinu dana obezbjedila duplo više sredstava za poticaje u poljoprivredi.

- Uvidjeli smo nedostatke i potrebe poljoprivrednika i naša je obaveza bila da ih podržimo. Sa 3,6 miliona ove godine poticaje smo podigli na 7,6 miliona KM kako bi smo omogućili kontinuiran razvoj poljoprivredne proizvodnje u Tuzlanskom kantonu. Nažalost, u moru nedaća poljoprivredne kulture su pretrpjele štetu od nevremena i grada. Zbog toga smo poduzeli dodatne aktivnosti na proširenju protivgradne zaštite na području Tuzlanskog kantona, rekao je ministar Šakić.

Prisutnima su se obratili u ime izlagača gradonačelnik grada Srebrenika Nihad Omerović, medijskih partnera direktor RTV TK Kasim Softić, te pokrovitelja Muamer Dervišević, predstavnik Ministarstva privrede Kantona Sarajevo. Istakli su da se mora iskoristiti sistemska integralna podrška kako bi se osigurala proizvodnja i ruralni razvoj, te pozvali sve nadležne institucije da podrže razvoj poljoprivredne i prehrambene industrije u Bosni i Hercegovini.

- Danas su osjećanja podijeljena. Tužan sam što zbog pandemije COVID-19 nismo uspjeli napraviti najveći sajam do sada, što

nam je to ove godine bila namjera. Istovremeno, sretan sam što smo se ponovo okupili i nismo prekinuli tradiciju, rekao je Hašim Šabanović, direktor Gradačačkog sajma.



Međunarodni sajam poljoprivrede i prehrambene industrije – Sajam šljive je najstarija specijalizovana privredna manifestacija u Bosni i Hercegovini. Osnovan je 1969. godine pod nazivom “Dan šljive” i ovo je 25. sajam koji se održava u kontinuitetu od 1996. godine do danas.

Posjetioci će, uz pridržavanje higijensko-epidemioloških mjera, imati priliku da vide prezentacije najnovijih proizvoda i usluga iz oblasti proizvodnje i prerade hrane i pića, poljoprivredne mehanizacije i zaštitnih sredstava.

Ulaz za posjetioce bio je besplatan, a sajam je trajao od 25. do 28. avgusta. Pokrovitelji su bili Vlada Tuzlanskog kantona, Vanjskotrgovinska komora BiH i Ministarstvo privrede Vlade Kantona Sarajevo a sponzori Adriatic osiguranje d.d., Agrokлуб i Turistička zajednica TK.



I ove godine je Kantonalna privredna komora Tuzla organizovala predstavljanje svojih članica na zajedničkom izložbenom prostoru pod nazivom „Privreda TK“. Svoje proizvode i usluge, predstavili su predstavnici grupacija za mlijeko, za gljive i za pčelarstvo koje djeluju u okviru komorskog Udruženja za poljoprivredu i prehrambenu industriju. Tu su još bili: “Fana“ Srebrenik, “Imel - Milo selo“ Lukavac, “Corn flips“ Srebrenik, “Borplastika“ Tuzla, “AgroLife“ doo Mionica, „FINra“, „Lović&Co“ Bistarac, “Cisp“ Tuzla, “Tehnograd comapany“ Tuzla, “Eko život“ Tuzla, “TQM“ Lukavac.

D.K.



Održan 18. sajam “List”...

“Privreda TK” na sajmu u Lukavcu

Dodijeljena priznanja i nagrada „Zvijezda turizma BiH“ za 2019. godinu, nagrada koju dodjeljuje Privredna/Gospodarska komora FBiH za značajna ostvarenja u podizanju kvaliteta turističkih usluga



Pored činjenice da je sajamska industrija teško pogođena novonastalom situacijom zbog pandemije izazvane korona virusom Covid 19, organizator je upio, na zadovoljstvo brojnih privrednika, po 18. put organizovati sajam u Lukavcu. Uz pridržavanje svih epidemioloških mjera, u centralnom gradskom parku, od 17. do 19. septembra je održan Međunarodni sajam turizma i ekologije „List“ Sajam je otvorio Denial Tulumović premijer Tuzlanskog kantona: „U mnogim zemljama ovo korona-ljeto protječe u znaku slogana: upoznaj svoju domovinu. I Bosna i Hercegovina je „osušena“ domaći turizam. Sve to ponovno je ukazalo na mali broj brendiranih destinacija i neadekvatnu turističku infrastrukturu. Očekujem da nam ovakve sajamske aktivnosti pomognu u savladavanju ovog izazova“, kazao je premijer Tulumović. „Poduzete su sve epidemiološke

mjere kako bi se Sajam mogao održati i kako bi bili zaštićeni i izlagači i posjetioci“, rekao je Edin Delić načelnik općine Lukavac. Značajno je pomenuti da su i ove godine na Sajmu, dodijeljena priznanja i nagrada „Zvijezda turizma BiH“ za 2019. godinu. „Zvijezda turizma BiH“ nagrada je koju dodjeljuje Privredna/Gospodarska komora FBiH za značajna ostvarenja u podizanju kvaliteta turističkih usluga, kao i doprinos razvoju i promociji turizma u Bosni i Hercegovini. Nagrada je uspostavljena prošle godine, a od ove godine se pored glavne nagrade „Zvijezde turizma BiH“, dodjeljuju i priznanja u nekoliko kategorija turistička organizacija, turistička manifestacija, receptivna turistička agencija, ugostiteljski objekt za smještaj u podkategoriji hotel i ostali objekti za smještaj te organizacija i/ili pojedinac za doprinos unapređenju turizma i podizanju kvaliteta turističkih usluga. Na temelju pravilnika koji je napravljen, objavljen je Javni natječaj za prijavu kandidata, te je formirana stručna komisija koju čine stručnjaci iz oblasti turizma u Bosni i Hercegovini, predstavnici turističkih zajednica, turističkih klastera, udruženja za turizam, privrednih komora, akademske zajednice i Međunarodnog sajma turizma i ekologije LIST. Komisija je razmotrila podnesene prijedloge, rangirala kandidate i donijela odluku o dodjeli priznanja i nagrada. U kategoriji za najbolju Turističku organizaciju priznanje je dobila JU Turistička organizacija grada Trebinje, u kategoriji za najbolju Turističku manifestaciju priznanje je dobila manifestacija „Andrinje“ – Podrumi Andrija d.o.o.Čitluk, u kategoriji za najbolju Receptivnu turističku agenciju priznanje je pripalo turističkoj agenciji Zoom Travel Vogošća, u kategoriji Ugostiteljski objekt za smještaj; podkategoriji Hotel priznanje je dodijeljeno Europe Group d.d. Sarajevo. U podkategoriji Ostalog objekta za smještaj priznanje je dobio Dalton d.d. Tuzla. Dok je u kategoriji Organizacija za doprinos unapređenju turizma i podizanju kvaliteta turističkih usluga priznanje pripalo Olimpijskom centru Jahorina. Priznanje za Pojedince za doprinos unapređenju turizma i podizanju kvaliteta turističkih usluga pripalo je Tomislavu Galiću. Privredna/Gospodarska komora FBiH, posthumno dodijelila i Posebno priznanje za životno djelo gospodinu Mili Bijavici, za izniman doprinos turizmu Bosne i Hercegovine. Bijavica je nedavno preminuo od posljedica virusa COVID 19. Priznanje je preuzeo njegov sin Mili Bijavica.



Ove godine Sajam je okupio nešto manji broj izlagača, nego što je to bio slučaj prethodnih godina, ali je on i ove godine zadržao svoj međunarodni karakter. Uz izlagače iz Bosne i Hercegovine, ove godine na Sajmu su učestvovali izlagači iz Albanije, Hrvatske, Srbije i Slovenije. Program sajma je modificiran, pa je umjesto takmičenja srednjih ugostiteljskih škola održano takmičenje u pripremi autohtonih jela, te okrugli stolovi posvećeni ekologiji i turizmu.

Kantonalna privredna komora Tuzla je na sajmu “List“ predstavila 21 svoju članicu na zajedničkom izložbenom prostoru pod nazivom “Privreda TK“. Na sajmu “List“ su predstavljene: “Solana“ Tuzla, “Dita“ Tuzla, “Ljubavna priča“ Tuzla, “Wortmann Metal“ Srebrenik, “Tuzla Kvarc“, “Zeka comerc“ Gračanica, “Tehna“ Gračanica “Mlin Nezić“ Gradačac, “Fana“ Srebrenik, “Imel - Milo selo“ Lukavac, “Borplastika“ Tuzla, „FINra“ Tuzla, „Lović&Co“ Bistarac, “Cisp“ Tuzla, “Tehnograd comapany“ Tuzla, “Eko život“ Tuzla, “TQM“ Lukavac, “Radius“ Gračanica, “Hotel Mellain“ Tuzla, Voćni rasadnik Srebrenik, “Poljogradnja“ Živinice.

Pripremio: Dino Kalesić



–Najava sajmskih manifestacija...

Zagreb: “ambienta” od 14. do 18. oktobra



Pozivamo vas da sudjelujete na 47. sajmu “ambienta” - međunarodni sajam namještaja, unutarnjeg uređenja i prateće industrije koji će se održati od 14.-18. listopada 2020. koji će organizirati Zagrebački velesajam i Grad Zagreb. Za sve dodatne informacije, ponude i dogovore rado Vam stojimo na raspolaganju:

- Nada Banek - tel. 01 6503 259, e-mail: nada.banek@zv.hr, www.zv.hr/ambienta
- Tamara Kolar - tel. 01 6503 666, e-mail: tamara.kolar@zv.hr

Beograd: 58. sajam nameštaja, 10 – 15. novembra 2020.



Najveći i najvažniji događaji u Jugoistočnoj Evropi u sferi dizajna, proizvodnje i distribucije nameštaja -58. Međunarodni sajam nameštaja, opreme i unutrašnje dekoracije, uz 58. Međunarodni sajam mašina i alata iz oblasti drvne industrije - i ove jeseni biće mjesto susreta proizvođača nameštaja i distributera, dizajnera, inženjera, arhitekata i šire javnosti. Šestodnevni renomirani evropski događaj i ove jeseni okupiće poslovne ljude, kompanije posvećene inovacijama, vrhunskom dizajnu, kvalitetu i funkcionalnosti nameštaja. U hali 5 biće izložene mašine i alati, i premijerno predstavljene tehničko - tehnološke inovacije od izuzetne važnosti za drvo prerađivačku industriju. Internacionalni karakter Sajam potvrđuje okupljanjem velikog broja poslovnih ljudi, kupaca, arhitekata, dizajnera i distributera iz regiona i svih krajeva Evrope. Veliki broj prestižnih kompanija koje će izlagati ove godine pokazuju da je Beogradski sajam sve atraktivniji i da se nalazi na mapi bitnih evropskih dešavanja. Tokom trajanja sajma posjetioci će imati priliku da pogledaju već poznatu Izložbu mladih dizajnera i da u programu Design Talks prisustvuju razgovorima sa eminentnim učesnicima iz cele Evrope. Vrhunac manifestacije i ove godine predstavljaju dodjela nagrade Zlatni ključ koju će internacionalni žiri dodijeliti najuspješnijim izlagačima za 2020. godinu.

Dobro došli na 58. Sajam nameštaja, od 10. do 15. novembra!
PRESS Beogradskog sajma
Ivana Višković tel: 011 2655 101, 063 395 871
Tamara Vasiljević tel: 011 2655 828, 063 328 169
E mail: press@sajam.rs
Web: sajamnamestaja.rs

D.K.



Obilježena značajna godišnjica...

FINra obilježila 4 godine uspješnog rada

Visoka škola za finansije i računovodstvo FINra u Tuzli danas je obilježila četiri godine postojanja i rada. U tom se periodu FINra etablirala kao visoka škola prepoznatljiva po svojim programima i nastavnom procesu koji studentima obezbjeđuju jedinstven spoj teorije i prakse.

Iako je četvrta godišnjica obilježena u vrijeme svjetske krize prouzrokovane koronavirusom, FINra je pokazala da je među onima koji krizu vide kao priliku za progres. Naime, od naredne akademske 2020/21. godine, uz već postojeći program „Finansije i računovodstvo“ FINra pokreće i novi licencirani studijski program „Računarstvo i informatika“ jedinstven u BiH i regionu i novo studijsko usmjerenje “IT u finansijama i računovodstvu”. Direktor ove Visoke škole doc.dr.sc. Ismet Kalić najavio je značajan iskorak.



„Od naredne akademske godine, uz već postojeći program „Finansije i računovodstvo“ FINra pokreće i novi studijski program „Računarstvo i informatika“. Već upisujemo studente na ovaj licencirani Program i moram kazati da je interes izuzetno dobar. Ovo je jedinstven studijski program u BiH i regionu. Našim studentima ćemo obezbijediti i vrhunske predavače i rad sa stručnjacima iz prakse, odnosno obavljanje prakse u uspješnim kompanijama. Na ovaj način nastavljamo misiju FINra, a to je da obezbijedimo savremeno i inovativno obrazovanje, koje odgovara potrebama tržišta rada. Zbog konstantno izražene

potrebe za programerima na tržištu rada FINra je kreirala novi studijski program “Računarstvo i informatika”. Na ovaj način će se profilirati kadrovi developers/programeri koji imaju osnovna znanja iz ekonomije. Stručne kompetencije svršenih studenata će sadržavati znanja i vještine programera/developera i znanja i vještine iz oblasti finansija i računovodstva. Na ovaj način dolazimo do sasvim novog profila kadrova za kojima postoji konstantna potražnja na tržištu rada u Bosni i Hercegovini i svijetu.” istakao je direktor Kalić. Ključni cilj koji je, prije četiri godine, postavljen pred menadžment i profesore FINra je da svojim studentima prenesu znanja i vještine sa kojima će biti konkurentni na tržištu rada, ali i da ih osposobe za samozapošljavanje, kroz otvaranje računovodstvenih servisa. Zbog toga je FINra svih ovih godina intenzivno radila na jačanju saradnje sa realnim sektorom, kako bi svojim studentima obezbijedila što bolje uslove za obavljanje prakse ali i zaposlenje. Do sada je potpisano više od 100 sporazuma o saradnji s uspješnim kompanijama. Osim toga potpisano je i niz sporazuma sa visokoškolskim ustanovama u BH i regionu, čime su stvorene pretpostavke za mobilnost studenata i profesora. FINra je u ovoj akademskoj godini potpisala Sporazum o saradnji sa Sveučilištem u Slavonskom Brodu i Sporazum sa Međunarodnim sveučilištem Libertas iz Zagreba te Visokom školom iz Virovitice u Republici Hrvatskoj. Potpisan je i Sporazum o poslovnoj saradnji sa Fakultetom za ekonomiju i informatiku Univerziteta u Novom Mestu, Slovenija. Potpisani su sporazumi o poslovnoj saradnji i sa univerzitetima i visokoškolskim ustanovama iz BIH, među kojima je i Sveučilište Vitez. Cilj potpisivanja Sporazuma o saradnji je poticanje akademske saradnje, stručnog i naučno – istraživačkog rada, poboljšanje studentskog standarda i unapređenje kvalitete visokoškolskog obrazovanja. Glavni zadaci koji će biti realizovani potpisivanjem ovog sporazuma jesu mobilnost studenata i nastavnog osoblja visokoškolskih ustanova kroz projekat „eRasmus plus“, te zajednički stručni i naučni projekti, razmjena informacija i izdavanje publikacija, organiziranje seminara, radionica i konferencija, upravljanje kvalitetom u području nastave i razvojni projekti finansirani iz evropskih fondova. Studentima i profesorima je obezbijeđen i besplatan pristup stručnoj literaturi, kakvu imaju njihove kolege bilo gdje u svijetu. Riječ je o biblioteci, koja broji više od 20 hiljada knjiga, savremene ekonomske literature. Rezultat je to dugogodišnje uspješne saradnje koju FINra ima sa Ebsco kompanijom. Sva ta partnerstva su potvrđena i na današnjoj svečanosti kojoj su putem ZOOM platforme uzeli učešće i predstavnici visokih škola i fakulteta iz Virovitice, Slavonskog Broda i Novog Mesta, te Ebsco kompanije. Čestitke u povodu obilježavanja četvrte godišnjice postojanja i rada Visoke škole za finansije i računovodstvo uputili su i predstavnici Tuzlanskog kantona, Grada Tuzle, Privredne komore i Grupacije poslodavaca Tuzlanskog kantona. Najboljim studentima, asistentima, predavačima i profesorima su uručena priznanja. FINra ovih dana upisuje petu generaciju studenata, a prva generacije privodi kraju svoje četverogodišnje obrazovanje. Na FINra se trenutno školuje oko 230 studenata, sa kojima radi više od 55 profesora, predanih stručnjaka, vođenih željom da njihovi studenti u svom poslu budu najbolji. Jedinstven spoj teorije i prakse.



Postanite vrhunski stručnjak za finansije, računovodstvo i IT.
Posjetite nas na adresi Mitra Trifunovića Uče br. 9 Tuzla.
Tel.: +387 35/310-390
E-mail: finra.studentskaslužba@gmail.com
Web: www.finra.ba



Komorski sistem...

Traže se izmjene “korona zakona”: Subvencije i za neto plaću!

Vladine subvencije treba da pokriju iznos zagarantovane neto minimalne plaće sa pripadajućim doprinosima



Komorski sistem Federacije Bosne i Hercegovine smatra da Vladine subvencije treba da pokriju iznos zagarantovane neto minimalne plaće sa pripadajućim doprinosima, budući da je sadašnje subvencioniranje dijela doprinosa u iznosu od 244,85 KM po radniku mjesečno nedovoljno da se privredna društva izbore i prežive krizu. U prijedlozima izmjena Zakona o ublažavanju negativnih ekonomskih posljedica upućenim Predstavničkom domu Parlamenta Federacije Bosne i Hercegovine navodi se da subvencioniranje treba da obuhvati i isplate plaća i doprinosa za mart 2020. godine, budući da su problemi sa poslovanjem i pad prihoda krenuli od početka 2020. godine). Takođe, komore traže da se subvencioniranje vršiti na način da Vlada FBiH direktno vrši isplatu sredstava, a nikako putem refundacije. Upozoravaju da zbog smanjenja

priliva sredstava kompanije nisu u stanju isplatiti plaće i doprinose za radnike i čekati da se izvrši refundiranje sredstava. Jedan od zahtjeva je i da se ostvareni promet utvrđuje na osnovu PDV prijave poslovnog subjekta čime će se izbjeći zagašenje porezne uprave i otežano dokazivanje ostvarenog prometa. Iz komorskog sistema, između ostalog, upozoravaju i da doneseni moratorij na plaćanje kredita za fizička i pravna lica još uvijek nije u funkciji, te banke samoinicijativno određuju uslove. - Iako je Vlada FBiH donijela zaključak i dala uputu Agenciji za bankarstvo FBiH, još uvijek na terenu nema pozitivnih primjera uspostave moratorija. Banke različito tumače moratorij i u skladu sa svojim interesima donose interne propise, navode iz komora. Također, još nisu uspostavljeni novi programi povoljnog finansiranja. Hitno je potrebno obezbijediti povoljne kreditne linije. Zbog smanjenog priliva sredstava, smanjena je finansijska sposobnost firmi – firme nemaju sredstava za održavanje osnovnih funkcija. - Imajući u vidu izuzetno tešku situaciju izazvanu pandemijom corona virusa (COVID-19), kao i da je sa današnjim danom u Federaciji BiH bez posla ostalo više od 15.000 radnika, Komorski sistem FBiH sugerise da se što je prije moguće donese zakonsko rješenje koje će pomoći kompanijama da prežive ovu situaciju i sačuvaju svoje radnike. Komorski sistem Federacije BiH smatra da bi Zakon o ublažavanju negativnih ekonomskih posljedica morao zaustaviti masovna otpuštanja radnika i pomoći kompanijama da očuvaju proizvodnju i radna mjesta. Zakon treba biti provodiv, funkcionalan i koristan za sve kompanije u Federaciji BiH koje su pretrpjele i trpe štetu, poručuju iz Komorskog sistema.

VTK spremna da preuzme ulogu izdavaoca EUR 1 certifikata

Vanjskotrgovinska komore Bosne i Hercegovine, pokretač digitalne transformacije u Bosni i Hercegovini



Na osnovu akta Ministarstva trgovine Republike Turske, u kojem je obrazloženo da od 1. jula 2020. godine njihov EUR-1 certifikat neće imati potpis organa koji je izdao EUR-1 certifikat, te da se validnost tog EUR-1 certifikata može provjeriti ili na osnovu otisnutog QR koda ili na osnovu pristupa službenoj web stranici Ministarstva trgovine Republike Turske korištenjem jedinstvenog linka upisanog u svakom EUR-1 certifikatu uzdužno sa lijeve strane, kao i na osnovu akta Ministarstva vanjske trgovine i ekonomskih odnosa Bosne i Hercegovine, Uprava za indirektno oporezivanje Bosne i Hercegovine dala je upute svim carinskim ispostavama o ovim promjenama na EUR-1 certifikatu iz Turske.

U otklanjanju nastalih zastoja i početnih nedoumica nadležnih organa u Bosni i Hercegovini pri postupanju i prihvatanju tako izdatog EUR-1 certifikata proaktivno djelovanje je imala i Vanjskotrgovinska komore Bosne i Hercegovine, koja nastoji biti pokretač digitalne transformacije u Bosni i Hercegovini, spremna da preuzme ulogu izdavaoca EUR 1 certifikata i drugih dokumenata u Bosni i Hercegovini na sličan i odgovoran način, korištenjem savremenih i potpuno sigurnih elektronskih modela i alata.



VTK BiH - Problemi kod izvoza svježeg voća i povrća iz BiH u EU

Vanjskotrgovinska Evropska unija donijela je provedbenu direktivu o zaštitnim mjerama protiv unošenja u EU organizama štetnih za bilje i biljne proizvode i protiv njihovog širenja unutar Evropske zajednice



Nakon usvajanja nove legislativne u EU krajem 2019. godine, izvoznici svježeg voća i povrća iz Bosne i Hercegovine suočavaju se sa poteškoćama kod plasmana svojih proizvoda u EU, navode iz Vanjskotrgovinske komore BiH (VTK BiH). Naime, Evropska unija donijela je provedbenu direktivu o zaštitnim mjerama protiv unošenja u EU organizama štetnih za bilje i biljne proizvode i protiv njihovog širenja unutar Evropske zajednice. Na osnovu donesene direktive države članice su morale donijeti zakone i druge propise potrebne za usklađivanje sa ovom direktivom do 31. augusta 2019. i dostaviti ih Komisiji. Primjena ove direktive je počela od 1. septembra 2019. godine. Slijedom toga, kako navode iz VTK BiH, Republika Hrvatska, članica Evropske unije, koja graniči sa Bosnom i Hercegovinom, odredila je samo dva granična prelaza na koje pošiljke bilja, biljnih proizvoda i drugih predmeta koji podliježu nadzoru fitosanitarne inspekcije mogu

ulaziti iz Bosne i Hercegovine i to GP Stara Gradiška na sjeveru i GP Nova Sela (Metković), a gdje se nadzor vrši samo radnim danom u vremenu od 8.00 do 16.00 sati na GP Stara Gradiška, odnosno od 7.00 do 15.00 sati na GP prelazu Nova Sela.

“Novom evropskom legislativom koja definiše službene kontrole predviđen je fitosanitarni pregled za biljne kulture i robu koja prethodno po ovom osnovu nije pregledavana od fitosanitarne inspekcije. Time se povećao broj fitosanitarnih pregleda i stvorile gužve na granici. To je osnovni razlog zbog čega se ukazala potreba za povećanjem broja graničnih prelaza gdje bi se mogao vršiti fitosanitarni nadzor kao i produženje radnog vremena postojećih graničnih prelaza”, navode iz VTK BiH.

Ovaj problem bio je tema sastanka koji je prošle sedmice organizovalo i Ministarstvo vanjske trgovine i ekonomskih odnosa BiH sa relevantnim udruženjima privrednika i VTK BiH. Kako navode iz VTK BiH, učesnici sastanka su kao kratkoročno rješenje predložili da se Vijeće ministara BiH obrati Vladi Republike Hrvatske sa zahtjevom da se produži radno vrijeme fitosanitarnih inspektora na graničnim prelazima Stara Gradiška i Nova Sela, i to radnim danima od 7 do 19 časova, te da se uvede radno vrijeme subotom od 7 do 15 časova. Također je kao dugoročno rješenje predloženo da se pokrenu pregovori za otvaranje novih graničnih prelaza sa Hrvatskom za promet roba koje podliježu fitosanitarnom i veterinarskom nadzoru. Za BiH je važan nesmetani izvoz, posebno imajući u vidu činjenicu da sektor voća i povrća u 2019. godini ostvario ukupan izvoz od 188 miliona KM, a 61 posto izvoza se odnosi na na zemlje EU s tim da je za većinu isporuka bh. izvoznika Hrvatska tranzitna zemlja. Pet najkonkurentnijih proizvoda iz sektora voća i povrća nosi 52 posto vrijednosti ukupnog izvoza. Tih pet proizvoda su: smrznute maline, svježe kruške, jabuke, kornišoni i šljive. **“VTK BiH podržava napore Ministarstva vanjske trgovine i ekonomskih odnosa BiH da se riješe ove poteškoće, ali u isto vrijeme i apeluje na sve nadležne institucije da u potpunosti razumiju hitnost djelovanja u vezi ovog pitanja pogotovo imajući u vidu činjenicu da se od sredine jula očekuje povećan izvoz sezonalnog voća i povrća”,** navode iz VTK BiH.

FIPA i PKFBiH planiraju unaprijeđenje novih investicijskih strategija

Vršiteljica dužnosti direktora Agencije za unapređenje stranih ulaganja u BiH (FIPA) Milica Marković i predsjednik Privredne komore FBiH Mirsad Jašarspahić razgovarali su o novim mogućnostima saradnje između dvije institucije i aktivnostima na pronalasku stranih investitora. Marković je upoznala predsjednika Komore s planovima rada Agencije u narednom periodu i inicirala organizaciju događaja na kojem bi se ponudila najadekvatnija rješenja za privlačenje novih investicija i podsticanje postojećih na nova reinvestiranje. Polazeći od činjenice da je ekonomija na globalnom planu doživjela recesiju izazvanu epidemijom Covida-19, neophodno je planirati unaprijed i razmatrati nove investicijske strategije. Ovaj period sve relevantne institucije treba da iskoriste za planiranje daljnjih koraka kako privući strane i podstaći domaće investicije, jer je ključno da BiH reaguje na vrijeme i stupi u kontakt sa svjetskim kompanijama u trenutku kada oni planiraju svoj daljni razvoj. Jašarspahić je predstavio rad Komore i podržao rad FIPA-e i istakao da će komora podržati suorganizaciju takvog događaja, zajedno sa drugim institucijama sa kojima će Marković organizovati sastanak u narednom periodu. Konstatovano je da su FIPA i Komora u svom radu upućene jedna na drugu, da će razmijenjivati informacije o potencijalnim investitorima, te da će između ostalog zajednički raditi na pronalasku strateških investitora za predložene projekte od privrednih subjekata u BiH.



Iz tekstilne industrije...

Tekstilna industrija u BiH bilježi velike gubitke

Narudžbe “kraće” skoro za trećinu - Virtuelna panel-diskusija
“Dan poslije u tekstilnoj industriji i industriji radne i korporativne odjeće”



Obim poslovanja u tekstilnoj industriji zbog posljedica virusa korona u ovoj godini bit će smanjen za između 25 i 30 posto, a jedan od glavnih razloga je smanjen broj narudžbi. Poručeno je ovo na virtuelnoj panel-diskusiji “Dan poslije u tekstilnoj industriji i industriji radne i korporativne odjeće”, koju je podržao švicarski SIPPO projekt, a na kojoj su učestvovali i privrednici iz regiona, prenose Nezavisne novine. BiH su predstavljali Vanjskotrgovinska komora BiH, Privredna komora RS, Udruženje UTOK, kompanije “Alma Ras”, “Bilkon” Bileća, “Exclusive Lingerie” Banja Luka, “Kuna export - import” Visoko, “Mras” Pale, “Studio Imaginarium” Banja Luka i “Zenko” Zenica. Rasim Memagić, izvršni direktor kompanije “Alma Ras”, smatra da je realno očekivanje da će poslovanje biti smanjeno od 25 do 30 posto. “U aprilu smo imali 85 posto smanjenje narudžbi, jer je sve bilo stalo, a kasnije je smanjen broj narudžbi u obimu od oko 20 posto”, rekao je. U njihovom slučaju pauza u radu trajala je mjesec i po, a nakon nastavka proizvodnje propisane mjere zaštite otežavaju samu organizaciju rada. “Dosta tekstilnih firmi je suočeno s otkazivanjem ili smanjenjem narudžbi pa su mnoge firme posegnule za preusmjeravanjem na proizvodnju maski i druge zaštitne opreme za naše tržište i za izvoz. Dosta firmi iz ove branše je na taj način sačuvalo mnogo radnih mjesta”, rekao je Memagić koji ističe da se tekstilna industrija susreće s neizvjesnošću koliko će narudžbi imati do kraja godine. Zbog toga oni u firmi traže alternativne kupce, kako bi zadržali nivo poslovanja. Amir Medić, generalni sekretar Udruženja tekstila obuće i kože BiH, rekao je da je osnovni problem tekstilne industrije to što su stale privredne aktivnosti u EU.

“U početnom periodu pandemije privredne aktivnosti praktično su bile zaustavljene, što se reflektovalo na nas u BiH, jer smo direktno zavisni od njih, odnosno više od 90 posto su lon poslovi. Nadamo se da će živnuti privredne aktivnosti u EU, posebno u nama najvažnijim zemljama: Njemačkoj, Italiji, Austriji i Švicarskoj”, rekao je Medić i istakao da su domaće firme spremne da rade, ali da su zbog nedovoljno narudžbi proizvođači u nevolji pa se najviše pribojavaju jeseni i smanjenja narudžbi, što bi ih moglo dovesti u žestoke probleme. “Ljudi su u poziciji da smanjuju obim poslovanja, a niko ne želi da otpušta radnika. Objektivno, nije bilo nekog otpuštanja, osim sporadičnog”, rekao je Medić.



Aleksandra Mihajlović Bijelić, sekretarka u Udruženju tekstila i obuće pri Privrednoj komori RS, kaže da je teško govoriti o poslovanju jer je situacija i dalje složena, a da je najteže što nema naznaka kada bi se ova kriza mogla završiti. “Firme koje imaju vlastiti brend bile su onemogućene da plasiraju svoje proizvode zbog zatvorenih trgovina, pa se gubici razlikuju u zavisnosti od preduzeća te se kreću oko 20-30 posto, a u nekim preduzećima i do 40 posto”, kaže Mihajlović Bijelić.

Ona kaže da se na ovoj panel-diskusiji moglo čuti da je u cijeloj Evropi ovom krizom najmanje pogođena proizvodnja radne obuće i odjeće. “Poseban akcent je stavljen na to da su veoma interesantne kompanije koje mogu da rade visokosofisticirane proizvode, kao što su skijaške jakne ili slično te će sigurno takve kompanije u budućnosti imati posla”, rekla je Mihajlović Bijelić. U ovoj industriji kompanije dobrim dijelom rade na starijim mašinama iako se stalno ulaže u opremu te je potrebno više ulagati u nove tehnologije i digitalizaciju. Mihajlović Bijelić je dodala da se najesen očekuje prilično teško stanje. “Preskočena je jedna sezona, nije bilo prodaje i sve ono što treba da se radi najesen radić će se smanjenim kapacitetom”, kaže ona.

D.K.



Iz oblasti turizma i utostiteljstva...

Turističko-ugostiteljski sektor u FBiH dnevno gubi 2 miliona KM

Sve više vaučer-turizma u BiH - “Ručak za sve” inicijativa za sada bez odjeka



Vlada Federacije BiH se upoznala o stanju u turističko-ugostiteljskom sektoru uzrokovanom pojavom koronavirusa (COVID-19) i prihvatila informaciju Federalnog ministarstva okoliša i turizma za preraspodjelu sredstava utvrđenih Budžetom FBiH za 2020. godinu. U informaciji je, pored ostalog, navedeno da se turističko-ugostiteljski sektor suočava s velikim gubitkom usljed nedostatka kretanja i putovanja ljudi, te su procjene da su gubici u turizmu u Federaciji BiH veći od 2.000.000 KM dnevno. Iako posluju s već iskazanim gubicima, računali za izmirenje režijskih mjesečnih troškova redovno pristižu i povećavaju troškove poslovanja. Poslovni subjekti iz ovog sektora trebaju obezbijediti i sredstva za isplatu plaća, uplatu doprinosa, kao za otplatu kredita, saopćeno je iz Ureda za odnose s javnošću Vlade FBiH. Kako je zaključeno, resorno federalno ministarstvo treba u roku od 15 dana pripremiti prijedlog uredbe koja bi ponudila pomoć u rješavanju problema navedenih u informaciji. Također, Vijeću ministara BiH bit će upućen zahtjev za fleksibilnije odredbe o ulasku u Bosnu i Hercegovinu, posebno kada je riječ o građanima porijeklom iz BiH.

• Sve više vaučer-turizma u BiH

- Turiste poklonima privlače i lokalne zajednice -
Turistički vaučeri jedan su od načina za podršku domaćem turizmu, a osim Republike Srpske na njihovo izdavanje odlučile su se i neke lokalne zajednice. Prvi je to uradio Grad Trebinje koje je u sklopu nagradne igre već nagradio sa 150 KM 60 najsretnijih učesnika za boravak i noćenje u ovom gradu. Na izdavanje vaučera odlučili su se i drugi jaki turistički centri, pa je tako Turistička organizacija Višegrada izvela prve dobitnike turističkih poklon-vaučera u okviru promotivne kampanje “Čekamo vas u Višegradu”. Predviđeno je više krugova izvlačenja a nagrađeni će odsjesti u hotelu Višegrad, kompleksu Andrićgrad, te u Višegradskoj banji. Najnoviji primjer vaučer-turizma dolazi iz Grada Bihaća gdje je Turistička zajednica pod sloganom “Odmori u Bihaću” planirala prodaju vaučera kako bi se ljudi prijavili i iskoristili 200 KM subvencije.

Za realizaciju projekta turističkih vaučera Grad Bihać osigurao je 100.000 KM iz budžeta, a UNDP 54.000 KM. - Ovo je pilot projekt koji će se sigurno prenijeti i u druge gradove Bosne i Hercegovine, kazao je v.d. direktor TZ Bihać Armin Amidžić. Turistička zajednica je raspisala javni poziv za učešće u provedbeni programa subvencioniranja turističkih i ugostiteljskih usluga putem vaučera koji je namijenjen registriranim privrednim subjektima koja pružaju turističke i ugostiteljske usluge na području Grada Bihaća, kao i poziv za dostavu ponude u postupku odabira online servisa koji nude prodaju turističkih ponuda putem vaučera. U glavnom gradu BiH Sarajevu nije bilo izdavanja vaučera, mada je Fondacija Sarajevo Navigator pokrenula je inicijativu “Ručak za sve”, koja bi podrazumijevala podjelu vaučera od 20 KM svim punoljetnim stanovnicima Kantona, koje bi oni imali pravo iskoristiti u roku dva mjeseca u nekom od ugostiteljskih objekata u Kantonu. Inicijativa je, za sada, ostala bez odjeka. Ipak, u Sarajevu je pokrenut projekat “Odmori u BiH”, osmišljen kao svojevrsna “prva pomoć” turističkom sektoru Bosne i Hercegovine. Kreirana je inovativna web platforma www.odmoriubih.ba kao marketinški kanal bh. turizma. Web platforma na jednom mjestu objedinjuje najbolje što BiH ima – kvalitetne turističke pakete, zanimljive aktivnosti, ture i transfere između destinacija, kao i tekstove, fotografije i videa koji će promovirati bh. turističku ponudu. U Republici Srpskoj je prema najnovijim informacijama izdato 2.133 turističkih vaučera. Ministrica trgovine i turizma Suzana Gašić kaže da građani Republike Srpske mogu iskoristiti vaučere u 70 smještajnih objekata i dvadesetak turističkih agencija. Najpoželjnije lokacije su Banja Vrućica, Višegrad, Nacionalni park Sutjeska i Etno selo Stanišići. I dok u RS-u program subvencija uveliko traje u Federaciji se na izdavanje vaučera još nisu odlučili, iako je ministrica turizma i okoliša Edita Đapo u medijima najavljivala da će i ovaj entitet sačiniti sličan program.

D.K.



„TQM“ Lukavac...

Prepoznatljiv brend na tržištu BiH

Ostvareni prihod 1,3 miliona KM u 2019. - Akreditacija TQM kao inspekcijskog tijela - Rast prihoda i dobiti za 10 posto u 2020.



Lider u oblasti laboratorijskih ispitivanja onečišćenja okoliša i projektovanja iz oblasti zaštite okoliša u FBiH, TQM d.o.o. Institut za kvalitet, standardizaciju i ekologiju Lukavac u 2020. obilježava deset godina uspješnog rada i očekuje rast prihoda i dobiti za 10 posto u odnosu na 2019. Tokom deset godina uspješnog rada i postojanja postavili su ljestvicu razine kvalitete usluga visoko i prema riječima Nermina Alića, direktora TQM d.o.o. Instituta za kvalitet, standardizaciju i ekologiju Lukavac, nastoje je i dalje povećati. „**Ponosni smo što smo za ovih 10 godina uspješnog rada stvorili brend pomalo neobičnog imena TQM, koji je postao prepoznatljiv na tržištu. Naša poslovna strategija zasniva se na uspješnom upravljanju odnosom s kupcima zasnovanim na povjerenju, visokom nivou kvalitete usluga i kontinuiranom poboljšanju, jer je samo zadovoljan kupac jedini način za stvaranje konkurentne prednosti na tržištu**“, istaknuo je Alić. A da su u oblasti laboratorijskih ispitivanja onečišćenja okoliša, kao i projektovanja iz oblasti zaštite okoliša u FBiH za “pola koplja” ispred ostalih kompanija, pokazuju i rezultati poslovanja TQM d.o.o. ostvareni u 2019. godini.



• Ostvareni prihod 1,3 miliona KM u 2019.

“**TQM d.o.o. Lukavac je u 2019. ostvario prihod od 1,3 miliona KM i neto dobit od oko 630.000 KM. Rast prihoda u odnosu na 2018. godinu je 3 posto, a rast dobiti u odnosu na 2018. je 37 posto. Nama je 2019. bila jako značajna jer smo rastom neto dobiti stvorili mogućnost investiranja u nove djelatnosti i nabavku nove opreme u 2020., zahvaljujući čemu sa sigurnošću dolazimo na čelo leaderske pozicije u oblasti laboratorijskih ispitivanja onečišćenja okoliša, kao i projektovanja iz oblasti zaštite okoliša**“, naglasio je Alić. U 2019. godini TQM d.o.o. je u oblasti projektovanja implementirao novu uslugu izrade elaborata zaštite izvorišta. U oblasti laboratorijskih ispitivanja uspostavili su veliki broj novih metoda fizičko-hemijskih ispitivanja svih vrsta voda, a u oblasti zaštite na radu i zaštite od požara uspostavili su softver za vođenje, nadzor, analizu i izvještavanje.



• Akreditacija TQM kao inspekcijskog tijela

Među najvažnijim projektima i investicijama u 2020. je akreditacija inspekcijskog tijela za ocjenu usklađenosti sistema kontinuiranog mjerenja emisija u zrak prema zahtjevima standarda BAS EN ISO 17020:2013, kod Instituta za akreditiranje BiH BATA. „**Time bi TQM d.o.o. Lukavac postao jedino inspekcijsko tijelo za ocjenu usklađenosti sistema kontinuiranog mjerenja emisija u zrak, te za područje FBiH osigurali kvalitet podataka sistema za kontrolu i monitoring emisija zagađujućih materija u zrak. Ovaj projekat se dijelom finansira od Fonda za zaštitu okoliša FBiH, uz učešće TQM d.o.o. Lukavac**“, tvrdi Alić. Među ostalim važnijim projektima TQM d.o.o. u 2020. godni je nabavka, instalacija, puštanje u rad opreme i akreditacija metoda ispitivanja na sofisticiranom uređaju GC/MS (Gas chromatography–mass spectrometry) za ispitivanje organskih jedinjenja u svim medijima. „**Takođe, spomenuo bih i nabavku, instalaciju, puštanje u rad opreme i akreditacija metoda ispitivanja na hidridnoj tehnici AAS (Atomic absorption spectroscopy) za ispitivanja specifičnih teških metala u svim medijima, kao i nabavku, instalaciju, puštanje u rad opreme i akreditacija metoda ispitivanja na uređaju AFS (atomic fluorescence spectroscopy) za ispitivanja prisustva žive u svim medijima**“, istaknuo je Alić. Kompanija TQM Lukavac posluje od 2007. godine, da bi 2010. bila izvršena pretvorba u viši oblik organizovanja i kompanija dobija puni naziv TQM d.o.o. Institut za kvalitet standardizaciju i ekologiju Lukavac. „**Od samog početka firma se bavi uvođenjem međunarodnih ISO standarda i to, sistema upravljanja kvalitetom ISO 9001, sistema okolinskog upravljanja ISO 14001, sistema zdravlja i sigurnosti na radu ISO 45001, sistema kvaliteta laboratorije i inspekcijskih tijela ISO 17020/17025, FSC (Forest Stewardship Council) – upravljanje šumama i FSC CoC za prerađivače drveta, CE označavanja proizvoda, zdrave hrane HACCP/ISO 22000, kao i edukacijom za interne auditore**“, objašnjava Alić.



• Rast prihoda i dobiti za 10 posto u 2020.

Danas TQM d.o.o. Lukavac ima oko 25 zaposlenih, mahom visoko obrazovanog kadra različitih stručnih usmjerenja i posluje kroz pet sektora i to: Sektor za mjerenje emisije u zrak, Sektor za analizu otpadnih voda i zemljišta, Sektor zaštite na radu i zaštite od požara, Sektor konsaltinga i certifikacije sistema i proizvoda i Sektor za projektovanje i izradu projekata uređenja i zaštite poljoprivrednog zemljišta. „U sklopu sektora za mjerenje emisije u zrak nalazi se laboratorij za mjerenje emisije zagađujućih materija u zrak i buke, opremljen opremom koja ispunjava standardne referentne norme i koji je akreditiran od Instituta za akreditiranje BiH BATA. Također, u sklopu sektora za analizu otpadnih voda i zemljišta nalazi se laboratorij za monitoring i ispitivanje kvalitete i kvantitete otpadnih voda i zemljišta sa opremom koja ispunjava standardne referentne norme i koji je akreditiran od Instituta za akreditiranje BiH BATA, pojašnjava Alić. Najvažnija karakteristika TQM kompanije je široka paleta usluga koju nude klijentima. „**Pri tome mislim na naš paket usluga zaštite na radu, zaštite od požara i zaštite okoliša, koja je potrebna svakom klijentu za njegovo sigurno i pravilno poslovanje. Rekli bismo da klijenti kod nas imaju sve na jednom mjestu**“, tvrdi Alić.

Planom poslovanja za 2020. u TQM d.o.o. zacrtali su rast prihoda i dobiti u 2020. godini za 10 posto u odnosu na 2019. „**Uprkos nastaloj situaciji sa pandemijom COVID -19, parametri na kraja prvog polugodišta 2020. pokazuju trend ispunjenja ciljeva. Međutim, njihovo konačno ostvarenje u najvećoj mjeri će zavisiti od stanja u ekonomiji, investicija, zaposlenosti i javnih prihoda u drugom polugodištu 2020.**“, rekao je Alić.



Vijesti iz privrede...

Wizz Air ukida još četiri leta iz Tuzle

Četiri je već ukinuo



Niskotarifni prijevoznik Wizz Air privremeno će obustaviti svoju jedinu liniju do Slovenije tokom nadolazeće zime, kao i osam linija iz svoje baze u Tuzli. Ovim najnovijim razvojem događaja Wizz Air privremeno će obustaviti 36 linija s tržišta u bivšoj Jugoslaviji, piše Ex-Yu Aviation.

Posljednji ovogodišnji prijevoz između Charleroija u Belgiji i Ljubljane zakazan je za 24. oktobar. Wizz Air će suspendirati još četiri rute na četiri koje su već suspendirane iz svoje baze u Tuzli. Aviokompanija će prekinuti letove za Berlin, Köln, Baden Baden i Vaxjo tokom zimske sezone, s planovima da ih obnovi krajem marta 2021. Usluge do Salzburga, Beča, Billunda i Friedrichshafena, koje su već obustavljene, ali su trebale biti obnovljene krajem oktobra, neće se vratiti na mrežu do ljetne sezone 2021. idućeg marta. Kao rezultat toga, Wizz Air će preko zime izvoditi letove iz Tuzle za Basel, Dortmund, Hahn, Memmingen, Eindhoven, Göteborg, Malme i Skavstu.

NLB Banka dobitnik priznanja Zlatni BAM

Nagrada za „Poseban doprinos u sferi društveno-odgovornog poslovanja“



Na tradicionalnoj manifestaciji „Večer bankara“, koja je održana u organizaciji finansijsko-poslovnog magazina „Banke i biznis“ i ove godine su, na osnovu revidiranih izvještaja o poslovanju banaka u Bosni i Hercegovini, odabrane one najuspješnije. NLB Banka d.d. Sarajevo je ovogodišnji dobitnik priznanja Zlatni BAM i to u kategoriji „Poseban doprinos u sferi društveno-odgovornog poslovanja“. NLB Banka svoju društvenu odgovornost pokazala je posebno u proteklom periodu kada je brojnim projektima pomogla onima kojima je pomoć bila najpotrebnija. Donirali su značajna sredstva zdravstvenim ustanovama, i to Kliničkom centru Univerziteta u Sarajevu i Univerzitetskom Kliničkom centru Tuzla za nabavku sanitetskog materijala u cilju prevencije širenja koronavirusa, pomogli su i bolnicama u Mostaru i

Zenici, te kantonolnoj bolnici u Goraždu, kojoj su donirali hemodijalizni aparat za uspostavu hemodijaliznog centra za pacijente ovog kantona. „Posebnu pažnju u proteklom periodu posvetili smo mikro i malim preduzećima, gdje smo im u sklopu projekta #OkvirPomoći, zajedno sa svojim partnerima, omogućili besplatno oglašavanje. Cilj nam je bio da im pomognemo da se za njih čuje, da pokažemo da u Bosni i Hercegovini imamo vrijedne brendove i privrednike kojima je neophodna podrška kako bi uspjeli i razvijali svoje biznise i dalje. Drago mi je da smo ovim projektom zaista skrenuli pažnju javnosti na njih, a i povratne informacije koje smo dobili od samih privrednika su više nego pozitivne. Sa pomoći nastavljamo i dalje“, poručila je Lidija Žigić, predsjednica Uprave NLB Banke d.d. Sarajevo. Poslovna strategija NLB Banke d.d. Sarajevo se zasniva na strategiji koja se fokusira na tri najvažnija stuba: usmjerenost na klijente, poboljšanje kvaliteta života, te ono što je za NLB grupaciju jedinstveno – nastaviti će da ovaj region posmatraju kao svoj dom. Misija Grupacije i jeste da ovaj region učini lijepim mjestom za život, da olakša i pomogne svojim klijentima/sugrađanima u svim izazovima sa kojima se suočavaju. I u narednom periodu aktivnosti Banke će biti usmjere kao tim ciljevima, kako bi u konačnici ostvarili i poslovne ciljeve, a to je pozicioniranje NLB-a kao regionalnog šampiona. „Mi smo iz ovog regiona i razumijemo potrebe građana i poslovni razvoj. To je naša prednost, ali i obaveza da brinemo o svojim klijentima. Ujedno je to i velika odgovornost, ali smatramo da mi to možemo, jer želimo biti tu za svoje klijente. Za sve što dolazi“, istakla je Žigić.

Otvoren S BOX - samouslužna poslovnica Sparkasse Bank u centru Sarajeva

Simbolično otvorenje u znaku podrške domaćim brendovima

Sparkasse Bank je otvorila svoj prvi S BOX – modernu, samouslužnu poslovnicu ispred Doma armije u Sarajevu. Ova mini poslovnica je jedinstvena po tome što se ne nalazi u okviru postojećih lokacija ili objekata banke, nego je samostalna jedinica na otvorenom parking prostoru u uskoj gradskoj jezgri, gdje klijenti mogu obavljati bankarske transakcije 24/7. Poštujući



preporučene preventivne mjere u aktualnoj situaciji, Sparkasse Bank je svoj unikatni S BOX otvorila bez svečanog obilježavanja i okupljanja zvanica, ali presijecanje vrpce nije izostalo. Vrata prostora je simbolično otvorila prva korisnica usluge mini poslovnice, kojoj su predstavnici banke uručili i prikladan poklon. Također, banka je otvorenje nove lokacije iskoristila kao priliku da pošalje još jednu poruku podrške bh. proizvođačima i brendovima, na čijoj promociji aktivno radi u proteklom periodu. Tako će u prvoj sedmici rada S-Boxa, svi korisnici usluga na poklon dobiti domaći paket osvježena – organski sok bh. brenda „Igman“ i originalnu „Bashka“ čokoladu iz slatkog programa ovog domaćeg porodičnog obrta. „S BOX je iskorak i nadogradnja našeg koncepta 24h Zona koje Sparkasse Banka ima širom BiH, ali na način da klijentima budemo dostupni tamo gdje je to njima najpotrebnije, a ne isključivo u okviru postojećih poslovnica ili objekata. Ovaj koncept samouslužne bankarske poslovnice kao samostalne jedinice u prostoru je svakako novitet, a vjerujemo da ćemo i sa odabirom lokacije našim klijentima ponuditi dodatnu vrijednost. Odlučili smo se za postavku S BOX-a na parking prostoru u uskoj gradskoj jezgri Sarajeva,

tako da naši korisnici mogu obaviti transakcije u roku nekoliko minuta, bez potrebe za traženjem parking mjesta da bi posjetili poslovnice banke. Ovo je samo jedna u nizu inovacija na kojima aktivno radimo, sa ciljem da se kroz nove, savremene finansijske servise poput online usluga i samouslužnih uređaja, približimo našim klijentima. Na kraju, aktualna situacija nam svima, kao pojedincima i institucijama donosi jednu novu dimenziju odgovornosti. Upravo zato, savjetujemo našim klijentima da koriste prednosti obavljanja finansijskih poslova bez čekanja u redu, na diskretan i sigurniji način, kakve upravo nudi S BOX“, izjavila je Elvira Prnjavorac, direktorica Sektora za razvoj poslovanja sa stanovništvom i malim preduzećima Sparkasse Bank. Sa otvaranjem S BOX-a, prestaje sa radom 24h Zona Sparkasse Bank u ulici Ferhadija, a nova samouslužna poslovnica ispred Doma armije opremljena je uređajima koji klijentima nude posebnu fleksibilnost, sigurnost i uštedu vremena. Depozitni uređaj (DATM) pravnim licima omogućava polog pazara bez ograničenja radnim vremenom banke, dok se na multifunkcionalnom bankomatu mogu vršiti uplate i isplate po tekućem računu te konverzija valuta.

MULTI LAB povećao učinkovitost sa aplikacijom SECCOM GPS

Pozitivne priče iz poslovnog svijeta



Veterinarski laboratorij „MULTI LAB“ d.o.o. Tuzla najsavremenija privatna laboratorija u BiH sa jasnim, zahtjevnim i kvalitetnim programom usluga mikrobioloških ispitivanja namirnica (hrane i sirovina), hrane za životinje, vode i predmeta opšte upotrebe, a sve u skladu sa Pravilnicima o mikrobiološkim kriterijima za hranu i Smjernicama za mikrobiološke kriterije u hrani. Pored odjeljenja za veterinarsko javno zdravstvo, „Multi Lab“ posjeduje i odjeljenje za zarazne, parazitarne i druge bolesti životinja, gdje stručni kadar, uz kvalitetnu opremu nudi laboratorijsku dijagnostiku zaraznih i parazitarnih bolesti životinja sa međunarodne liste OIE-a. Laboratorije, kao i sve pojedinačne metode koje se izvode, su akreditirane od strane Instituta za akreditiranje Bosne i Hercegovine (BATA) po zahtjevima standarda BAS EN ISO/IEC 17025:2018., Jasnim željama i ciljevima preduzeća za objedinjenjem paketa usluga za klijente djelatnost

„Multi Lab“-a obuhvata i provođenje mjera dezinfekcije, dezinfekcije i deratizacije, u cilju sprječavanja nastanka i širenja zaraznih bolesti. Osoblje preduzeća je izuzetno ponosno na svoj doprinos u suzbijanju pandemije COVID-a, gdje su zajedno sa menadžmentom, kao društveno odgovorno preduzeće, izvršili dezinfekciju na više od 2.300.000 m², na području cijele Bosne i Hercegovine. Naš pristup prema klijentu je partnerski, u smislu pružanja usluge koja je prilagođena realnim potrebama klijenta. Za naše klijente organiziramo obuke uposlenika, vršimo uvid u tehnološke postupke i sistem samokontrole sa preporukama za nadogradnju istog, te smo na raspolaganju za konsultacije svih vrsta iz područja našeg djelovanja. U cilju kvalitetnijeg poslovanja i bolje komunikacije sa korisnicima naših usluga koristimo aplikaciju za satelitsko praćenje vozila sa optimizacijom voznog parka SECCOM GPS, a koja je razvijena i implementirana od strane IMPERIUM DOO. Bitna odluka za odabir i poslovanje sa IMPERIUM DOO bili su standardi ISO 9001:2015 (sistemsko upravljanje kvalitetom, jasno razumjevanje klijenta uz precizno davanje informacija) i ISO 27001:2013 (sigurno upravljanje informacijskim podacima, zaštita informacija klijenta). Kako bismo nastavili rast poslovanja, te održali konkurentnost na tržištu i kvalitet usluge, moramo racionalizirati naše troškove, te na taj način ostvariti uštede. Usluga SECCOM GPS za nas je odličan alat u poboljšanju našeg rada, učinkovitosti i profitabilnosti. Navedena aplikacija povećava sigurnost vozača, te u mnogome doprinosi brzom i optimalnom dolasku uposlenika do odredišta. Također, ostvarili smo optimalno korištenja vozila od strane uposlenika, umanjili troškova goriva i održavanja vozila, te postigli tačne evidencije prekovremenih sati i korištenja vozila izvan radnog vremena.

D.K.



Iz Vlade Tuzlanskog kantona...

Usvojene informacije o stanju turističko-ugostiteljske i trgovačke djelatnosti



Vlada je prihvatila informacije o stanju turističko-ugostiteljske i trgovačke djelatnosti na području Tuzlanskog kantona u 2019. godini. Kada je u pitanju turizam u 2019. godini Tuzlanski kanton bilježi skoro identičan broj dolazaka. Trend rasta je s pozitivnim predznakom, ali u odnosu na rast zabilježen 2018.godine u odnosu na 2017.godinu može se konstatovati da nije napravljen značajniji iskorak. Broj dolazaka domaćih turista, koji je zabilježen u našim smještajnim objektima je, u odnosu na 2018.godinu, veći za 6,80%, ali je zato broj inostranih dolazaka u padu za 7,5%, što ostavlja prostora za ozbiljnija promišljanja u budućnosti. Broj turista koji su koristili usluge smještaja na području Tuzlanskog kantona predstavlja 3,35% od ukupnog broja registriranih dolazaka u Bosni i Hercegovini, odnosno 4,43% od ukupnog broja registriranih dolazaka u Federaciji Bosne i Hercegovine i u oba slučaja bilježi se smanjenje učešća Tuzlanskog kantona u sveukupnim turističkim kretanjima na nacionalnom nivou. Najveći broj od ukupnog broja registriranih dolazaka evidentirano je u smještajnim objektima na području Grada Tuzla, tačnije 58%, po 11% dolazaka evidentirano je u Gradačcu i Srebreniku, Lukavcu 9%, Živnicama, Gračanici i Banovićima po 3%, dok je po 1% od ukupnog broja turista smještaj koristilo na području općine Kalesija i općine Kladanji. U smještajnim objektima na prostoru Tuzlanskog kantona tokom 2019. godine ostvareno je 146.107 noćenja što je za 11,52% više ostvarenih noćenja nego u 2018. godini. Ohrabruje činjenica da je, i pored činjenice da se zadržao isti broj dolazaka, broj noćenja u značajnijem porastu, što znači da se posjetioci zadržavaju duže vremena na području Tuzlanskog kantona, te da smještajni objekti imaju povećanje iskorištenosti smještajnih kapaciteta. Broj noćenja domaćih posjetilaca bilježi rast od 15,90%, dok broj noćenja stranih posjetilaca bilježi povećanje od 3,50%. Od ukupnog broja noćenja, ostvarenih na području Tuzlanskog kantona, 42% noćenja je ostvareno u smještajnim objektima koji se nalaze na području Grada Tuzla.

S druge strane, kada je u pitanju oblast trgovine, za razliku od prethodnih godina, u 2019.godini evidentan je blagi pad novootvorenih pravnih i fizičkih lica u oblasti trgovine. Uzrok tome može se tražiti u povećanom broju velikih tržnih centara i pojavom velikog broja online trgovina putem društvenih mreža. Broj zaposlenih u Tuzlanskom kantonu 31.12.2019. godine, prema podacima FZS FBiH, iznosio je 99.067, i veći je za 2.606 osoba, odnosno za 2,70% u odnosu na 2018. godinu. Od tog broja zaposlenih, u trgovini je bilo 18.055 što je za 159 osoba odnosno 0,89% više u odnosu na prosjek 2018. godine.



• Vanjskotrgovinska razmjena u porastu

Kada je u pitanju vanjskotrgovinska razmjena, ukupna vrijednost izvoza Tuzlanskog kantona u 2019. godini iznosila je 1.791.793.000,00 KM, što je više za 3,58 % u odnosu na 2018. godinu. Istovremeno privredni subjekti u Tuzlanskom kantonu tokom 2019.godine uvezli su robe u vrijednosti 2.142.316.000,00KM, što je za 10,30% više nego u 2018.godine, kada smo imali uvoz od 1.942.326.000,00KM. Može se zaključiti da je spoljnotrgovinski deficit u 2019. godini iznosio 350.523.000,00KM, a pokrivenost uvoza izvozom 83,63%, što je manje u odnosu na 2018.godinu kada je pokrivenost uvoza izvozom bila 89,04%, a spoljnotrgovinski deficit 212.514.000,00 KM. Najveći negativni spoljnotrgovinskibilans Tuzlanski kanton ima



sa Italijom, Mađarskom i Njemačkom. Pozitivan spoljnotrgovinskibilans Tuzlanski kanton ima sa Srbijom 219.806.000,00 KM, sa smanjenjem od 4,28% u odnosu na 2018.godinu, Austrijom 151.176.000,00 KM uz povećanje od 26,98%, te Slovenijom 121.607.000,00KM i Hrvatskom 47.928.000,00KM. U 2019.godini rast spoljnotrgovinskog suficita sa Hrvatskom i dalje ima najintenzivniji rastući trend sa 334,13%.

• Više od 60 miliona KM beskamatnih kreditnih sredstava za privredu TK

Vlada Tuzlanskog kantona osigurala je novih 60,5 miliona KM izuzetno povoljnih, beskamatnih kreditnih sredstava za privredne subjekte sa područja Tuzlanskog kantona. Naime, Vlada je danas proglasila najpovoljnijom ponudu UNICREDIT BANK DD MOSTAR, koja je dostavljena po Javnom pozivu za odabir banke za plasman kreditne linije uz subvencioniranje dijela kamatne stope iz sredstava Budžeta Tuzlanskog kantona za 2020. godinu privrednim subjektima sa područja Tuzlanskog Kantona. Za subvencioniranje kamatne stope Vlada je osigurala 2,1 milion KM. Ukupno raspoloživi kreditni iznos podijeljen je po vrsti djelatnosti kojom se privredni subjekti bave. Tako će za privredne subjekte sa proizvodnom djelatnošću biti raspoloživo ukupno 26,1 milion KM, za privredne subjekte trgovinske djelatnosti 23,5 miliona KM, a za privredne subjekte uslužne djelatnosti 10,1 milion KM. Ponuda banke podrazumijeva visinu kamatne stope od 2,95%, uz troškova obrade kredita od 0,29 %, pri čemu je rok otplate kredita 72 mjeseca uz grace period do 12 mjeseci. Imajući u vidu da je Vlada predvidjela da subvencionira kamatnu stopu do 3%, to znači da će privredni subjekti na raspolaganju imati beskamatna kreditna sredstva. Ministar privrede TK Asmir Hasić rekao je da ovako povoljna sredstva privredni subjekti nemaju nigdje u EU.

• Stipendije za učenike deficitarnih zanimanja

Vlada je na 60. redovnoj sjednici utvrdila uslove, kriterije, postupak i načina isplate za dodjelu stipendijaredovnim učenicima prvih razreda srednjih škola koji upišu zanimanje saListe deficitarnih zanimanja za školsku 2020/2021. godinu. Deficitarna zanimanja za školsku 2020/2021. godinu su: zavarivač, zidar-fasader-izolater, krojač, konobar, kuhar, plinski i vodoinstalater, autoelektričar, stolar, tapetar i rukovalac rudarske mehanizacije površinskog kopa.Ukupna visina stipendije, po jednom učeniku iznosi 900 KM, a isplatit će se u devet mjesečnih rata u visinama po 100 KM. Imajući u vidu planirana sredstva, to znači da će se stipendirati ukupno 143 učenika. Pravo na dodjelu stipendije imat će kandidati u statusu redovnog učenika koji su prvi puta upisali prvi razred srednje škole za zanimanje sa Liste deficitarnih zanimanja za školsku 2020/'21. godinu.



• Održana deseta sjednica Kantonalnog odbora za razvoj

Na desetom sastanku Kantonalnog odbora za razvoj (KOR), analiziran je Izvještaj o razvoju sa izvještajem o implementaciji Strategije razvoja Tuzlanskog kantona 2016-2020. godina za 2019. godinu, te je usaglašena njegova finalizacija. Ovom prilikom predstavljen je Metodološki okvir procesa izrade Strategije razvoja Tuzlanskog kantona za period 2021-2027. godina, kao i Akcioni plan procesa izrade ove strategije. Tokom sastanka predstavnici Ministarstva privrede i glavni konsultant na izradi Strategije razvoja, prof. Bahrija Umihanić, upoznali su članove KOR-a sa do sada realizovanim aktivnostima te predviđenim daljim koracima u procesu izrade Strategije. Kao što je ovom prilikom istaknuto, postupak izrade Strategije razvoja će se vršiti u skladu sa Zakonom o razvojnom planiranju i upravljanju razvojem u Federaciji Bosne i Hercegovine i pratećim podzakonskim aktima. Strategija razvoja Tuzlanskog kantona 2021-2027. godina će biti bazirana na razvojnim prioritetima Tuzlanskog kantona, strateškim dokumentima viših nivoa vlasti, ali i na provedenoj evaluaciji Strategije razvoja Tuzlanskog kantona 2016-2020. godina. Nosilac izrade Strategije razvoja Tuzlanskog kantona je Ministarstvo privrede, a horizontalna koordinacija izrade Strategije razvoja osigurati će se kroz Kantonalni odbor za razvoj. Učesnici u procesu izrade Strategije razvoja Kantona su institucije Tuzlanskog kantona, jedinice lokalne samouprave i socio-ekonomski partneri u



Tuzlanskom kantonu, dok će vertikalna koordinacija izrade Strategije razvoja biti osigurana kroz Vijeće za razvojno planiranje i upravljanje razvojem u Tuzlanskom kantonu.

U svrhu jačanja sistema za upravljanje razvojem, sa ciljem poticanja razvoja kantona, unapređenja životnog standarda i poboljšanja kvalitete usluga koje se nude građanima, podršku Vladi Tuzlanskog kantona pruža Projekat integriranog lokalnog razvoja (ILDP), zajednički projekat Vlade Švicarske i UNDP-a u BiH.



Farma zdrave hrane – „Milo selo“...

Pozitivna priča o vrijednim farmerima

Svakodnevna proizvodnja zdrave hrane i dostave na kućni prag!



Farma Milo selo prostire se na površini od 25 hektara netaknute prirode u podnožju planine Ozren. Okruženje je idealno za proizvodnju prirodnih i zdravih proizvoda, poštujući režime organske proizvodnje.

Na farmi možete pronaći kozje mlijeko, proizvode od kozjeg mlijeka, domaće sezonsko povrće i voće, razne vrste džemova, pekmeza, sokova, zimnice, čajeva, meda i proizvoda na bazi meda kao što su propolis kapi i propolis sprej, a svakodnevno se radi na proizvodnji novih proizvoda kako bi asortiman bio što raznovrsniji.

I pored novonastale vanredne situacije koja svima otežava i obavljanje osnovnih zadataka, na farmi se proizvodnja odvija redovno, te se svakodnevno proizvodi zdrava hrana.

Svjesni su da je proizvodnja posebno povrća na konvencionalni način dosta isplativija i lakša, ali da nije ni približno zdrava i korisna kao proizvodnja po principima organske proizvodnje, a u moru proizvoda punih raznih pesticida i aditiva svima je i više nego potrebna zdravija i prirodija alternativa.



Na farmi kažu da su prepoznali potrebu za zdravom hranom, vraćanjem zaboravljenim tradicijama koju je užurban život odavno zamijenio kao jednim od najvažnijih faktora za očuvanje zdravlja, jačanja imunog sistema i naravno popravljajući već narušenog zdravlja kod hroničnih bolesnika.

Zdrava hrana koja jača imunološki sistem nam je svima trenutno najpotrebnija, a da biste izbjegli bespotrebna izlaganja opasnosti, izlaske vani, čekanje, na farmi su se potrudili potruditi da Vam se Vaša narudžba omiljenih proizvoda dostavlja na kućni prag.

U cilju olakšavanja svima da dođu do zdravih namirnica pored redovnih dostava na kućnu adresu utorkom uvedene su i dodatne dostave subotom za područje Lukavca, grada Tuzle i Živinica.



A u cilju širenja dostupnosti proizvoda na području cijelog kantona, uvedene su i dostave za područje Brčkog i Srebrenika (dostave se organizuju svake druge sedmice četvrtkom).

Sam proces pravljenja narudžbi je dodatno olakšan, te naručiti, a i saznati više informacija možete pozivom na broj (ili viber) 061 175 258, putem poruke na fb stranici, ili popunjavanjem forme na www.miloselo.ba, a namirnice će čim prije biti dostavljene na Vaš prag.

Njihov cilj još od samog početka je omogućavanje građanima zdravih životnih navika, od mogućnosti konzumiranja potpuno zdravih prirodnih raznih vrsta proizvoda koje farma nudi, do uživanja u čarima prirode i svježem planinskom zraku. Ipak, obzirom na to da većina ljudi trenutno nije u prilici otići do prirode, jedan od ciljeva je svakako i donijeti prirodu na kućni prag bar u vidu zdrave korpe namirnica.

D.K.



Švedska kompanija od jula u Tuzli...

Kompanija Transcom nastavlja zapošljavati u Tuzli

Poslovanje u 22 zemlje – Ukupno 26 hiljada uposlenika – U Tuzli pokrenut projekat za inostranog partnera



Transcom, međunarodna kompanija za unaprijeđivanje iskustava klijenata, u julu 2020. godine svojim dolaskom u Tuzlu otvorila je svoja vrata na bh. tržištu. Riječ je o švedskoj kompaniji koja posluje u 22 zemlje i zapošljava 26.000 uposlenika globalno.

Potencijal Tuzle prepoznat je od strane Transcomovog globalnog tima zbog iznimno kvalitetnog kadra koji Tuzla pruža u vidu kandidata za posao koji aktivno govore njemački jezik. U Tuzli je pokrenut projekat za inostranog partnera koji posluje u području trgovine elektronske opreme, a agenti koji rade u kontakt centru pružaju podršku kupcima i klijentima ovog velikog trgovačkog lanca.

Kontakt centar u Tuzli zaposlio je više od 50 zaposlenika, a Transcomov plan je zaposliti više od

150 zaposlenika do kraja 2020. godine. Svim usposlenicima osigurane su maske, dezinfekcijska sredstva i razmak između radnih jedinica, kako bi uz najviše standarde sigurnosti mogli obavljati svakodnevne zadatke. Također, djelatnicima u Tuzli omoguena je atraktivna plata uz motivirajuće mjesečne bonuse, zaposlenje uz ugovor o radu na puno ili nepuno radno vrijeme, profesionalna obuka za posao u trajanju od dvije sedmice uz prijavu od prvog dana obuke, dva slobodna dana u sedmici i niz drugih pogodnosti. Tuzlanski tim prepoznao je prednosti koje kompanija pruža te je u kratkom roku među kolegama razvijen visok stepen povezanosti, što je vidljivo i na temelju zajedničkih timskih druženja koja organiziraju u svoje slobodno vrijeme, kako bi bolje upoznali kolege i osnažili energiju tima.

Zaposlenici Transcoma u Tuzli svakodnevno komuniciraju s klijentima sa njemačkog govornog područja putem telefona i emaila, a svaki kandidat koji se svojim radom istakne ima mogućnost napredovanja i izgradnje karijere u međunarodnom okruženju. Transcom u regionu postoji već duže od 13 godina te konstantno bilježi pozitivne poslovne rezultate i dodatno se razvija, što je potvrdio i svojim dolaskom u Tuzlu. Menadžment kompanije iznimno je ponosan na ostvarene poslovne uspjehe u Tuzli i s optimizmom gleda na budućnost, uz planove za dodatan razvoj i zapošljavanje velikog broja novih kolega u globalnom timu.

Situacija vezana uz globalnu pandemiju potaknula je kompaniju da prilagodi svoje procese poslovanja novonastalim okolnostima, pa je to učinjeno uz minimalne napore budući da kompanija prati sve trendove na tržištu i kompletno je digitalizirala svoje poslovanje. Detaljnije informacije vezane uz samu kompaniju i otvorena radna mjesta moguće je pronaći na web stranici kompanije ili na njihovim društvenim mrežama Facebook i Instagram stranici, putem kojih je moguće stupiti u kontakt s Transcom timom te saznati više informacija o radu u kompaniji i svim mogućnostima koje kontakt centar u Tuzli pruža.



“Pružio sam sebi šansu. Nalazim se u svjetskoj atmosferi, a nisam morao otići iz Bosne i Hercegovine. Drago mi je što je međunarodna kompanija Transcom prepoznala nas kao izazovno tržište za timski rad i odličan ambijent. Svakom bih preporučio da se priključi ovakvoj priči, jednostavno pružite sebi šansu, nemojte gubiti vrijeme. Idemo zajedno u svjetske uspjehe”, reko je Asmir Šestan, stručnjak za prikupljanje novih talenata u Transcomu BiH.

Klix




Led display na zgradi Komore...

NOVA USLUGA ČLANICAMA I FIRMAMA U TK



Poštovani, Led digitalno oglašavanje, u poređenju s tradicionalnim medijima oglašavanja, poput billboarda, čijeg se sadržaja jedva sjeti manji od 40 posto gledatelja, u zadnje vrijeme ima velike prednosti. Osim mogućnosti višestrukog reklamiranja jednog oglašivača na istom mediju, dokazano je da su pokretne reklamne poruke daleko više privlačnije nego statične reklame. Obavještavamo vas da je Kantonalna privredna komora Tuzla u prilici ponuditi vam oglašavanje na našem led displayu po povoljnijim uslovima.




**POSTANITE PARTNER KANTONALNE PRIVREDNE
KOMORE TUZLA!!!**
OGLASITE SE NA NAŠEM LED DISPLAY PROSTORU!!!
**ISKORISTITI IZUZETNO POVOLJNE GODIŠNJE I
ŠESTOMJESEČNE PONUDE!!!**
POSEBNE POGODNOSTI ZA FIRME ČLANICE KOMORE!!!
Kantonalna privredna komora Tuzla
Kontakt osoba: Dino Kalesić
mob: 061/164-311
tel: 035/369-562
mail: dino@kpktz.ba
POSJETITE NAS! DOBITE DA SE DOGOVORIMO!!!



PRIVREDNA KRETANJA NA PODRUČJU TUZLANSKOG KANTONA ZA I KVARTAL 2020. GODINE

U prvom polugodištu 2020. godine došlo je do rasta ukupnog obima industrijske proizvodnje u odnosu na isti period prethodne godine za 2,2%. Prema područjima, prerađivačka industrija ostvaruje pad od 5,3%, a rast ostvaruju proizvodnja i snabdijevanje električnom energijom 19,1% i vađenje ruda i kamena 6,1%.



Industrijska proizvodnja I-VI 2020/ I-VI 2019 (%)

U periodu januar- juni 2020. godine iz Tuzlanskog kantona ukupno je izvezeno proizvoda u vrijednosti od 803.252.000 KM što je u odnosu na izvoz istog perioda 2019. godine pad od 11,3%. U isto vrijeme je došlo do pada uvoza od 18,8% te je uvezeno roba u vrijednosti od 890.226.000 KM. Pokrivenost uvoza izvozom je 90%, a vanjskotrgovinski deficit

je 86.974.000 KM.

U odnosu na isti period prošle godine, došlo je do rasta izvoza hrane i pića 4,8% i kapitalnih proizvoda 14,4%, dok je došlo do pada izvoza industrijskih materijala za 4,8%, goriva i maziva 38%, transportnih sredstava 32,7% i proizvoda za široku potrošnju 13,4%.

Rast uvoza ostvaren je kod hrane i pića 7,2%, dok je u svim ostalim sektorima došlo do pada i to: industrijskih materijala 13,4%, proizvoda za široku potrošnju 18%, goriva i maziva 41,7%, kapitalnih proizvoda 21,5% i transportnih sredstava 22,3%. Najznačajniji vanjskotrgovinski partneri Tuzlanskog kantona su Njemačka, Slovenija, Italija, Hrvatska i Austrija.


Prema podacima Porezne uprave Federacije BiH, u Tuzlanskom kantonu je trenutno 99.914 zaposlenih osoba, što je za 1.739 osoba manje u odnosu na januar 2020. U posmatranom periodu je na Zavodu za zapošljavanje evidentirano 78.031 nezaposlenih osoba. Prosječna neto plata u Tuzlanskom kantonu u junu je iznosila 868,00 KM što je ispod prosjeka Federacije BiH. U odnosu na kantonalni prosjek iz 2019. godine, neto plaća je veća za 5,3%. Najviše prosječne neto plate u Tuzlanskom kantonu su u sektoru proizvodnje i opskrbe el.energijom (1.651 KM), dok su najniže prosječne neto plate u ugostiteljstvu i hotelijerstvu (526 KM).

Djelatnost		Tuzlanski kanton	
		Neto plaća	Bruto plaća
A	Poljoprivreda, šumarstvo i ribolov	840	1.264
B	Vađenje ruda i kamena	1.066	1.638
C	Prerađivačka industrija	671	1.007
D	Proizvodnja i snabdijevanje el.en., plinom	1.651	2.576
E	Snabdijevanje vodom i uklanjanje otpadnih voda	936	1.429
F	Građevinarstvo	572	859
G	Trgovina na veliko i malo	630	954
H	Prevoz, skladištenje i komunikacije	712	1.061
I	Hotelijerstvo i ugostiteljstvo	526	794
J	Informacije i komunikacije	1.183	1.836
K	Finansijske djelatnosti	1.303	2.038
L	Poslovanje nekretninama	805	1.235
M	Stručne, naučne i tehničke djelatnosti	949	1.469
N	Administrativne i pomoćne uslužne djelatnosti	607	898
O	Javna uprava i odbrana	1.290	1.999
P	Obrazovanje	851	1.311
Q	Zdravstvena socijalna zaštita	1.384	2.167
R	Umjetnost, zabava i rekreacija	722	1.110
S	Ostale uslužne djelatnosti	957	1.463

STRUČNA SLUŽBA KOMORE



THE CHAMBER OF ECONOMY OF TUZLA CANTON



TUZLA CANTON

Your Business Partner

